

Siunnersuummut nassuiaatit

Nalinginnaasumik nassuiaatit

1. Aallaqqaasiut

Inatsisartut 2024-mi ukiakkut ataatsimiinnermi nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisissaattut siunnersuut (UKA 2024/86) suliaarat. Inatsisissatut siunnersuut ilaatigut aasaanerani nalunaaquttap atorunnaarsinneqarneranik ilaatigullu nalunaaquttat ingerlaqatigiiffiannut UTC -3-mut – taamaattorli sulii periarfissaqartillugu sumiiffiit aalajangersimasut (taakkununga ilanngullugit ass. Danmarkshavn Pituffik Space Base-ilu) eqqarsaatigalugit taakku nalunaaquttat ingerlaqatigiiffiannik allamik malinninnissaat pillugu Naalakkersuisut nalunaaruteqarsinnaanerannut - ikaarsaariartoqarneranik kinguneqartussaagaluarpog.

Qinersinissamilli nalunaaruteqartoqarnerata malitsigisaanik inatsisissatut siunnersuut siullermeerneqareernermi kingorna atuukkunnaarpog. Taamaattumik inatsisissatut siunnersuut saqqummiuteqqinneqarpog allanngortinnagu – atuutilersiffaali pisariaqartumik allanngortillugu. Atuutilerfissaata allanngortinneqarnerata malitsigissavaa Inatsisartut inatsisaat ulloq 24. oktober 2026 nal. 24.00 atuutilissammat. Inatsisartut inatsisaat taamaalilluni piffissap inatsisissatut siunnersuutip akuerineqarfissaatut naatsorsuutigineqartup kingorna ukiup ataatsip missaata qaangiunnerani atuutilertussaassaaq. Inatsisissatut siunnersuummut siusinnerusukkut saqqummiunneqartumut sanilliullugu taamaaliornikkut nalunaaquttat ingerlaqatigiiffiata allanngortinneqarnissaanik siunnersuutigineqartumut naleqqussarnissamut inuussutissarsiortut piffissaqarnerulissapput.

Kalaallit Nunaat Danmark Europamilu nunat naalagaaffeqatigiiffianni (EU-mi) nunat allat assigalugit 1980-imiilli aasaanerani nalunaaqutaqartarsimavoq. Siusinnerusukkuttaq – 1948-mi 1949-mi – Landsrådit aalajangernerat malillugu Kalaallit Nunaanni aasaanerani nalunaaqutaqarsimavoq.

Aasaanerani nalunaaqutaq tassaavoq piffissap ullup unnuallu aallartittarfiata ukiup ilaani piffissami aalajangersimasumi nalinginnaasumik piffissap naatsorsorneqartarneranut sanilliullugu nalunaaquttap akunneranik ataatsimik nikisinneqartarnera.

Aasaanerani nalunaaqutaq pillugu Kalaallit Nunaannut inatsimmi nr. 817, 19. december 1989-meersumi Kalaallit Nunaata Kalaallit Nunaanni aasaanerani nalunaaquttamik atuutsitsilernissamut pisinnaatitaaneq tiguaa. Pisinnaatitaaneq taanna Aasaanerani nalunaaquttap atorineqarnera pillugu Inatsisartut inatsisaanni nr. 14-imi, 19. oktober 1989-meersumi atorineqarpog.

Aasaanerani nalunaaquttap atorineqarnera pillugu Inatsisartut inatsisaat 2023-mi Nalunaaquttap aalajangersarneqarnera pillugu Inatsisartut inatsisaatigut nr. 31-kkut 25. november 2022-meersukkut atuukkunnaarsinneqarpoq, aasaanerani nalunaaqutaq pillugit malittarisassanik Naalakkersuisut aalajangersaasinnaaneranik piginnaatitsissut Inatsisartut inatsisaanni ingerlateqqinneqarluni, taamalu sulii atuulluni.

Siusinnerusukkut aasaanerani nalunaaquttap atorunnaarsinnissaa suliniuteqarnissaq kissaatigineqarsimavoq, kingullermik 2019-imi upernaakkut ataatsimiinnermi immikkoortoq 55 ”Aasakkut nalunaaquttap atorunnaarsinnissaa suliniutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut” aqqutigalugu. Siunnersuut akuerineqarpoq, kisianni sulii piviusunngortinneqanngilaq. Inatsisartut aalajangiinerannut EU-mi (European Union) aasaanerani nalunaaquttap atorunnaarsinneqarnissaata apeqquataatinneqarnera tamatumani pissutaavoq. EU-mi aasaanerani nalunaaqutaq sulii atorunnaarsinneqanngilaq.

Nalunaaquttap aalajangersarneqarnera pillugu Inatsisartut inatsisaat 25. november 2022-imi atuutilerpoq.

Inatsisartut inatsisaata Kalaallit Nunaata annersaata nalunaaquttat ingerlaqatigiiffiannit UTC-3-mit UTC-2-mut ikaarsaariarnera malitsigaa. Taamaalilluni nalunaaqutaq akunnermik ataatsimik siuartinneqarpoq. Nalunaaqutaq taamaalilluni ullup ilaani 12.00-iusimagaluarluni 13.00-inngorpoq.

Ittoqqortoormiit nalunaaquttat ingerlaqatigiiffiannit UTC-1-imiit UTC-2-mut ikaarsaariarpoq, taamaalillunilu nalunaaqutaq akunnermik ataatsimik kinguartinneqarluni. Nalunaaqutaq taamaalilluni ullup ilaani 12.00-iusimagaluarluni nal. 11.00-inngorpoq. Inatsisartut inatsisaata taamaalilluni malitsigaa Ittoqqortoormiit nalunaaquttat ingerlaqatigiiffiannut, Danmarkshavn aamma Pituffik Space Base sulii immikkut ingerlaqatigiiffeqartut eqqaassanngikkaanni, Kalaallit Nunaata sinneranut atuuttumut ikaarsaariarmat.

Tamatuma kingorna paasinarsivoq innuttaasut amerlasuut nalunaaquttat ingerlaqatigiiffiat nutaq ajornartorsiuteqarfiusut misigisaraat.

2024-mi apriliimi sapaatit akunnerisa marluk ingerlaneranni inuit atsiornarinik katersisoqarpoq tassanilu inuit 3.100-ut missaasa nalunaaquttat ingerlaqatigiiffiannut UTC -3-mut (tassa nalunaaquttat ingerlaqatigiiffiannut siusinnerusukkut Kalaallit Nunaata annersaanut atuuttumut) ikaarsaariarnissaq, taamatullu aamma aasaanerani nalunaaquttap atorunnaarsinneqarnissaa, taperserlugu.

Inatsisartut inatsisaata allanngortinneqarneranik Inatsisartut inatsisissaattut siunnersuutip kissaat tamanna naammassivaa.

Innuttaasut kissaataat nalunaaquttallu ingerlaqatigiiffiannik nutaamik misilittakkat tunngavigalugit taamaalilluni aasaanerani nalunaaqutaqartarnermik aaqquissuussinerup atorunnaarsinneqarnissaa taamatullu aamma nalunaaquttat ingerlaqatigiiffiannut UTC-3-mut ikaarsaariarnissaaq siunnersuutigineqarput – taamaattorli nalunaarusiornikkut Naalakkersuisut periarfissaqartillugit sumiiffiit aalajangersimasut (tamatumani ass. Danmarkshavn aamma Pituffik Space Base) eqqarsaatigalugit taakku nalunaaquttat ingerlaqatigiiffiannik allamik malinnissinnaanissaannut.

2. Siunnersuummi immikkoortut pingaarnert

2.1. Aasaanerani nalunaaquttap atorunnaarsinneqarnera

A) Inatsisiliornertit atuuttut

Nalunaaquttap aalajangersarneqarnera pillugu Inatsisartut inatsisaanni nr. 31-mi 22. november 2022-meersumi §1-imi immikkoortut pingajuanni Naalakkersuisut piginnaatinneqarput aasaanerani nalunaaqutaq pillugu malittarisassanik aalajangersaanissaminnut.

Aalajangersagaq taanna tunngavigalugu Aasaanerani nalunaaqutaq pillugu Namminersorlutik Oqartussat nalunaarutaat nr. 15, 27. marts 2024-meersoq Naalakkersuisut atulersippaat.

Nalunaarummi aalajangersarneqarpoq aasaanerani nalunaaqutaq marsip qaammataani sapaat kingulleq UTC+0 nalunaaqutaa malillugu nal. 01.00 aallartissasoq (tassa Kalaallit Nunaannut nalunaaqutaq nalinginnaasoq UTC-2 malillugu marsip qaammataani arfininngornermi kingullermi nal. 23.00. Aasaanerani nalunaaquttap aallartinnerani nalunaaqutaq nalunaaquttap akunneranik ataatsimik siuartinneqassaaq, nalunaaqutaq arfininngornermi nal. 23.00-imiit sapaammi nal. 00.00-imut nikisinneqarluni.

Aasaanerani nalunaaqutaq oktobarip qaammataani sapaat kingulleq UTC +0 nalunaaqutaa malillugu nal. 01.00 atuukkunnaassaaq (Kalaallit Nunaanni aasaanerani nalunaaqutaq malillugu 00.00). Aasaanerani nalunaaquttap atuukkunnaarnerani nalunaaqutaq nalunaaquttap akunneranik ataatsimik kinguartinneqassaaq nalunaaqutaq sapaammit nal. 00.00-miit arfininngornermut nal. 23.00-mut nikisinneqarluni.

Nalunaarut Danmarkshavnimut Pituffik Space Base-imullu atuutinngilaq. Danmarkshavn aamma Pituffik Space Base eqqarsaatigalugit Danmarkshavnimi aamma Pituffimmi (Thule Air Base) nalunaaquttap ingiaqatigiiffianik aalajangersagaq aammalu aasaanerani nalunaaquttap atuusinnaanera pillugit Namminersorlutik Oqartussat nalunaarutaat atuuppoq. Nalunaarummi § 1-imi Danmarkshavn eqqarsaatigalugu aasaanerani nalunaaqutaq atorineqassanersoq taamaassappallu qaqugu naalagaaffimmi oqartussanut attuumassutilinnut aalajangigassanngortinneqarpoq. Aalajangersakkami § 2-mi Thule Air Base (ullumikkut Pituffik Space Base) eqqarsaatigalugu USA-mi oqartussat taamaaqataanik piginnaatinneqarput.

B) Siunnersuuteqartup isumaliutai

Aasaanerani nalunaaquttamik nikisitsisarnermik aqqissuussinerit siulliit Europami nunani assigiinngitsuni 1916-imi atuilersinneqarput. Taamani sorsunnersuup siulliup kingornatigut ikummatissamik amigaateqarnerup nassataanik nukissamik sipaaruteqarnissaq siunertaasimavoq. Aasaanerani nalunaaquttamik nikisitsisarnermik aqqissuussineq ikummatissamik amigaateqarnerup qaangiukkiartornera ilutigalugu atorneerukkiartulertorpoq. Sorsunnersuup kingulliup kingorna aamma taamatut pisoqaqqippoq, kiisalu 70-ikkunni ikummatissamik amigaateqalernermit atorneqaqqilerluni – 70-ikkulli qaangiutereersut aasaanerani nalunaaquttamik nikisitsisarnermik aqqissuussineq attatiinnarneqarluni.

EU aasaanerani nalunaaquttap nikisinneqartarneranut 1996-imi assigiissaarivoq, taamaalilluni aasaanerani nalunaaquttamik nikisitsisarneq nunani EU-mut ilaasortaasuni tamani ataatsikkut piffissamilu assigiissumi pisalerluni.

Ullumikkut nunarsuaq tamakkerlugu nunat 70-it missaanniittut aasaanerani nalunaaqutaqartitsisarnermik aqqissuussinermit atuisuupput.

Aasaanerani nalunaaquttap nikisinneqartarnerata eqqunneqarneranut pissutaavoq ullup qaamarngata unnuup tungaanut sapinngisamik atorluarneqarnissaa.

Ullumikkulli aasaanerani nalunaaquttamik nikisitsisarnerup, nukissanik sipaaruteqarnissaq eqqarsaatigalugu, sunniutai killeqalernikuupput, tamanna innaallagialu ullumikkut qaammaqqusersornermut atorneqartoq qangaanerusumut sanilliullugu annikinnerummat. Pærit sipaarniutit kiisalu LED atorlugu qaammaqqusersuinerit allat siaruaasimanerisa innaallagissamik atuineq malunnaatilmik annikillisissimavaat, qaammaqqusersuinerlu innaallagissamik atuinermut tamarmiusumut ilanngartuutaavallaarunnaarsimalluni.

Aqqissuussinerup Danmarkimi innaallagissamik ukiumut atuineq, DONG Energy'p uuttortagai malillugit, taamaallaat procentip ataatsip missaanik appartittarpaa. Ilisimasat naapertorlugit aqqissuussinerup nunami maani qanoq annertutigisumik nukissanik sipaaruteqaataatiginera qulaajarniarlugu misissuisoqarsimanngilaq.

Aasaanerani nalunaaqutaqarnerup sunniutaasa minnerulernerat peqatigalugu ajoqutaasut tappiffigineqarnerulernikuupput. Ukiut kingulliit ingerlanerini ilisimatuut misissuinerisa takutippaat nalunaaquttamik nikititsisarneq peqqinnissamut ajoqutaasoq. Sunniutit taakku sininnerup akornuserneqarneranik timillu pissusilersorneranik allannguinermik aallaaveqarnerat ilimagineqarpoq. Aasaaneranut ikaarsaarnep kingunerit pillugit misissuinerit tamarmiunngillat assortorneqarsinnaanngitsumik takutitsisut, misissuinerillu ilaat assortuussutaapput.

Aasaanerani nalunaaqutaqartitsisarnermik aqqissuussinerit innuttaasut akornanni annertuumik nuannarineqarneq ajornerat taamatuttaaq erseqqippoq. EU-kommissioni

assersuutigalugit 2018-imi tamanut ammasumik aasaanerani nalunaaqutaqartitsisarnermik aaqqissuussineq pillugu tusarniaatitsivoq. Akissuteqartunit katillugit 4,6 mio.-iusunit 84%-iisa aaqqissuussinerup atorunnaarsinneqarnissaa kissaatigaat. USA-mi 2022-mi isumasiuinerup (Monmouth University Poll) takutippaa isumasiorneqartut 61%-iisa atorunnaarsinneqarnissaanut isumaqataasut.

Aasaanerani nalunaaqutaqartarnerup atorunnaarsinneqarnissaanik siusinnerusukkut aalajangiiffigisassatut siunnersuutaasarsimasunut (UKA 2016/88 aamma UPA 2019/55) akissuteqaatigisarsimasaminni Naalakkersuisut uparuarpaat aasaanerani nalunaaqutaq Europa tamarluinnaat Amerikamilu avannarlermi atorneqarmat oqaatigalugu Naalakkersuisut isumaqarmata ataatsimut suut tamaasa isigalugit pissusissamisoornerusoq nunarpassuarni Kalaallit Nunaanni innuttaasut, inuussutissarsiortut oqartussallu ulluinnarni attaveqarfigisartagaanni aasaanerani nalunaaquttap atorneqarnera malikkaanni.

EU-p inatsisartuisa 2019-imi marsimi ukiuunerani aasaaneranilu nalunaaqutaqartarnerit ukiumoortumik nikisinneqartarnerata atorunnaarsinneqarnissaannik EU-kommissionimit siunnersuut akueraat. Siunnersuulli naammassineqarsinnaassappat EU-p ministerrådiata siunnersuummik ilaliinissaa piumasaqaataavoq, tamannalu sulii pisimanani.

Aasaanerani nalunaaquttamik nikisitsisarnermik aaqqissuussaq atorunnaarsinneqassappat, ukiuunerani nalunaaquttap imaluunniit aasaanerani nalunaaquttap najoqqutatut atorneqarnissaa pillugu nunat ilaasortaasut isumaqatigiissuteqarnissaat ministerrådimit kissaatiginartinneqarpoq. Nunat ilaasa ukiuunerani nalunaaquttamik najoqqutatut malinninnissaq toqqarpassuk allallu aasaanerani nalunaaquttamik najoqqutatut malinninnissaq toqqarpassuk, EU-mi nalunaaquttap ingerlaqatigiiffii marlunnik ilaratarsinnaapput. EU-mi nalunaaquttap ingerlaqatigiiffii ullumikkut pingasuupput. Tamanna nunat akornanni killiligaanngitsumik niueqatigiinnermik ajornakusuulersitsissaaq. Maannakkutullu isikkoqartillugu nalunaaquttamik ataatsimoorussamik najoqqutaqarnissaq isumaqatigiinngiffiuvoq.

UKA2019/55-ip oqaluuserineqarnerani aasaanerani nalunaaquttap atorunnaarsinneqarnissaa Inatsisartut ilalerpaat, naatsorsuutigaluguli EU-p aamma aasaanerani nalunaaquttamik atorunnaarsitsinissaa. Tamannali sulii naammassineqarsimanngilaq naammassiniarneqarneralu sivisoorujussuusinnaalluni.

Tamanna tunngavigalugu siunnersuuteqartup nalilerpaa EU-mi aalajangiisoqarnissaanik Kalaallit Nunaata sulii utaqqinissaa isumaqanngitsoq – mannanu piffissanngortoq aasaanerani nalunaaqutaqartitsisarnermik aaqqissuussinerup ajoqutaasa pitsaaqutaanit annertunerunerat pissutigalugu allanngortinneqarnissaanut.

C) Siunnersuut

Siunnersuutigineqarpoq Naalakkersuisut aasaanerani nalunaaqutaq pillugu malittarisassanik aalajangersasinnaanermut piginnaatitaanerat atuuttoq killilerneqassasoq taamaallaat Danmarkshavnimut Pituffik Space Base-imullu atuuttussanngorlugu, taamatullu aamma aasaanerani nalunaaqutaq pillugu nalunaarut atuuttoq (Namminersorlutik Oqartussat nalunaarutaat nr. 15, 27. marts 2024-meersoq) atuukkunnaarsinneqassasoq.

Piginnaatitsissutikkut siunnersuutigineqartukkut Danmarkshavn aamma Pituffik Space Base eqqarsaatigalugit aasaanerani nalunaaqutaqartitsisarnermik aaqquissuussineq Danmarkshavnimi aamma Pituffimmi (Thule Air Base) nalunaaquttap ingiaqatigiiffianik aalajangersagaq aammalu aasaanerani nalunaaquttap atuusinnaanera pillugit Namminersorlutik Oqartussat nalunaarutaanni nr. 8-mi, 24. marts 2023-meersumi aalajangersarneqarsimasoq Naalakkersuisut attatiinnarsinnaassavaat.

Kalaallit Nunaanni sumiiffiit allat eqqarsaatigalugit siunnersuutip malitsigissavaa aasanerani nalunaaquttap ulloq 24. oktober 2026, nal. 24.00 atuutilersumik atorunnaarsinneqarnera.

Kalaallit Nunaannut aasaanerani nalunaaquttap atorunnaarsinneqarnerata ukiut tamaasa piffissami marsimi sapaatip kingulliup aamma oktobarimi sapaatip kingulliup akornanni EU suli aasaanerani nalunaaqutaqartitsisarnermik aaqquissuussisoqarsimatillugu Kalaallit Nunaata EU-milu nunat (Danmark ilanngullugu) akornanni piffissat assigiinnginnerat nalunaaquttap akunneranik ataatsimik sivitsusaaq.

2.2. Nalunaaquttat ingerlaqatigiiffiannut nutaamut ikaarsaariarneq

A) Inatsisiliornerit atuuttut

Nalunaaquttap aalajangersarneqarnera pillugu Inatsisartut inatsisaanni nr. 31-mi 25. November 2022-meersumi § 1, imm. 1-mi aalajangersarneqarpoq Kalaallit Nunaannut nalunaaquttamut nalinginnaasumut nalunaaquttamut malitassaq aamma nalunaaquttat ingerlaqatigiiffiat UTC -2 malinneqartoq.

Inatsisartulli inatsisaanni § 1, imm. 2-mi Naalakkersuisut piginnaatinneqarput sumiiffinni erseqqinnerusumik allanneqartuni nalunaaquttat ingerlaqatigiiffiat alla malinneqassasoq pillugu maleruagassanik aalajangersaasinnaanerminnut.

Aalajangersagaq taanna tunngavigalugu Naalakkersuisut

Aalajangersagaq taanna tunngavigalugu Naalakkersuisut Danmarkshavnimi aamma Pituffimmi (Thule Air Base) nalunaaquttap ingiaqatigiiffianik aalajangersagaq aammalu aasaanerani nalunaaquttap atuusinnaanera pillugit Namminersorlutik Oqartussat nalunaarutaat nr. 8, 24. marts 2023-meersoq atuutilersissimavaat. Nalunaarummi § 1-mi Danmarkshavn eqqarsaatigalugu nalunaaquttat ingerlaqatigiiffiata aalajangersarneqarnissaanut

naalagaaffimmi oqartussat susassaqtut aalajangersaanissaminut piginnaatinnearput nalunaarummi § 2-mi Thule Air Base (ullumikkut Pituffik Space Base) eqqarsaatigalugu USA-mi oqartussat taamaaqataanik piginnaatinnearput.

Tamanna naapertorlugu Danmarkshavnip nalunaaquttat ingerlaqatigiiffiat UTC+0 malippaa Pituffik Space Base-ip nalunaaquttat ingerlaqatigiiffiat UTC-4 malikkaa.

Kalaallit Nunaanni sumiiffiit allat tamarmik – taakkununga Ittoqqortoormiit, siusinnerusukkut nalunaaquttat ingerlaqatigiiffiannik namminerisamik malitaqarsimasoq, aamma ilanngullugit – ullumikkut nalunaaquttat ingerlaqatigiiffiannut UTC-2-mut ilaapput.

B) Siunnersuuteqartup isumaliutai

Kalaallit Nunaat ulloq 25. marts 2023, nal. 22.00 nalunaaquttat ingerlaqatigiiffiannut UTC-2-mut ikaarsaariarpoq. Tamanna Kalaallit Nunaanni nalunaaquttap nalinginnaasup nalunaaquttap akunneranik ataatsimik siuartinneqarneranik kinguneqarpoq.

Kalaallit Nunaat taamaalilluni nalunaaquttat ingerlaqatigiiffii eqqarsaatigalugit Amerikap avannarliup kangimut sineriaata Europallu kimmuk sineriaata akornanni qiterpiaanni inissisimavoq sumiiffinnut pineqartunut tamanut piffissap assigiinngissutaa nalunaaquttap akunneri pingasuullutik.

Tamanna pivoq piffissap aalajangersarneqartarnera pillugu Inatsisartut inatsissaannut Naalakkersuisut siunnersuutaata (UKA 2022/17) Inatsisartunit akuersissutigineqarneratigut Nalunaaquttat ingerlaqatigiiffiannut UTC-2-mut ikaarsaariarnissamut Naalakkersuisut siunnersuuteqarnerannut suna tunuliaqutaanersoq piareersaataasuni takujuminaappoq. Naalakkersuisulli inatsisissatut siunnersuummik saqqummiussissumminni erseqqissarpaat siunnersuutip inuussutissarsiornermut, minnerunngitsumik silaannakkut angallannermut, aningaasaqarnikkut pitsaasumik kinguneqarnissaat naatsorsuutigineqartoq.

Inatsisissatut siunnersuummut nalinginnaasumik nassuiaatini Naalakkersuisut paasisutissiissutigivaat siunnersuutip innuttaasunut innuttaasulluunniit peqqissusiannut kinguneqarnissaa naatsorsuutigineqanngitsaq.

Islandimi peqqissutsimut ministeriaqarfiup ataani suleqatigiissitap taamaalilluni 2018-imi inerniliuppaa Islandimi nalunaaquttat ingerlaqatigiiffiata piffissallu seqinnerfiusartut assigiinnginnerisa napparsimalersinnaaneq annertusisittaraa, meeqqat atuartut ilikkagaqarsinnaanerit ajornerulersittaraa, taamatullu aamma minnerunngitsumik meeqqat inuusuttullu akornanni nanertisimanermik qasunermillu eqqorneqarsinnaaneq annertunerulersittarlugu.

Nalunaaquttat ingerlaqatigiiffiannut UTC-2-mut Kalaallit Nunaata ikaarsaariarnerata kingorna paasinarsisimavoq innuttaasut ikigisassaangitsut nalunaaquttat ingerlaqatigiiffiat nutaaq ajornartorsiutitut misigisimagaat.

2024-mi apriliimi sapaatit akunnerisa marluk ingerlaneranni inuit atsiornernik katersisoqarpoq tassanilu inuit 3.100-ut missaasa nalunaaquttat ingerlaqatigiiffiannut UTC -3-mut (tassa nalunaaquttat ingerlaqatigiiffiannut siusinnerusukkut Kalaallit Nunaata annersaanut atuuttumut) ikaarsaariarnissaq, taamatullu aamma aasaanerani nalunaaquttap atorunnaarsinneqarnissaa taperserlugu.

Atsiornernik katersuisitsinerup tusagassiorfinnit allaaserineqartarneranut atatillugu atuarneqarsinnaavoq nalunaaquttat ingerlaqatigiiffiata allanngortinneqarnera arlallit meeqqaminnut sunniteqarsimasoq misigisarsimagaat, tassa meeqqat unnukkut sininniarnerminnik ullaakkullu makinniarnerminnik atuariartornissaminnullu ajornartorsiuteqartarsimammata. Taamatutaaq atuarneqarsinnaasimavoq Kalaallit Nunaata Avannaani aalisartorpassuit piniartorpassuillu piniariarnissaminnut seqerngup nuinissaa utaqqikatattarsimagaat. Akerlianik nalunaaquttat ingerlaqatigiiffiat maanna atuuttoq aammalu ualikkut unnukkullu akunnerit qaamarngannik amerlanernik silamilu sammisaqarnermut atorneqarsinnaasunik nassataqartoq timersortartunit iluarisimaarneqartoq tusagassiorfitsigut aamma allaaserineqarpoq.

Nalunaaquttat ingerlaqatigiiffiat maanna atuuttoq inuussutissarsiortunut iluaqutissartaqartoq iluaqutissartaalu taakku inuussutissarsiortut ilaannut pingaaruteqartut siunnersuummik matuminnga tusarniaanermi akissutit uppersarparaat. Siunnersuuteqartorli isumaqarpoq akornutit innuttaasunit amerlasoorpassuarnit misigineqartut isiginiarneqangitsoorneqarsinnaangitsut. Inuussutissarsiortut soqutigisaat salliutinniarneqartariaqarput, tamannali nunami innuttaasut pilliutigalugit pinngisaannartariaqarluni.

Misilittagaalersimasut taamaalillutik nalunaaquttat ingerlaqatigiiffiannut UTC -3-mut uternissaq oqariartuutigaat.

C) Siunnersuut

Siunnersuummi aalajangersarneqarpoq nalunaaquttamut malitassaq aammalu nalunaaquttap ingerlaqatigiiffia sorleq Kalaallit Nunaanni malinneqassanersoq. Siunnersuummi siunnersuutigineqarpoq nalunaaquttamut malitassaq tassaassasoq UTC, aammalu nalunaaquttamut nalinginnaasumut nalunaaquttap ingerlaqatigiiffia UTC -3 malinneqassasoq.

Kalaallit Nunaanni ullumikkut nalunaaquttap ingerlaqatigiiffia UTC -2 malinneqarpoq. Taamaalilluni siunnersuummi siunnersuutigineqarpoq Kalaallit Nunaanni nalunaaqutaq nalinginnaasoq nalunaaquttap akunneranik ataatsimik kinguartinneqassasoq.

Taamaallilluni seqineq Kalaallit Nunaata Kitaani nal. 12 missaani qutsinnerpaaffiminissaq – kisiannili Tunumiunngitsoq Qaanaamiinngitsorlu. Ittoqqortoormiini seqineq nal. 10 missaani qutsinnerpaaffiminissaaq, Tasiilami nal. 11 missaani Qaanaamilu nal. 14 missaani qutsinnerpaaffiminiissalluni.

Ullumikkut Kalaallit Nunaata Islandillu, Savalimmiut aamma Kunngeqarfik Tuluit Nunaat aamma Irland Avannarleq akornanni nalunaaqutaq nalunaaquttap akunnerinik marlunnik nikingassuteqarpoq. Kalaallit Nunaat aamma Danmarkip, Norgep, Sverige, Tysklandip allallu Europap kitaaniittut akornanni nalunaaqutaq nalunaaquttap akunnerinik sisamanik nikingassuteqarpoq. Aammalu Kalaallit Nunaata aamma Grækenlandip, Bulgariaip aamma Rumænien akornanni nalunaaquttap akunnerinik tallimanik nikingassuteqarluni. Nalunaaquttap ingiaqatigiiffiat, siunnersuummi siunnersuutigineqartutut. UTC-3-mut nikisikkaanni, tassani nalunaaquttap nikingassutaa nalunaaquttap akunneranik ataatsimik sivikillissaaq.

Amerikap avannarliup kangiata sineriaani, soorlu assersuutigalugu Iqaluit, Quebec, Toronto, Boston, New York, Washington D.C. aamma Miami, nalunaaquttap ingerlaqatigiiffiani UTC-5-imiippoq. Ullumikkut Kalaallit Nunaata Amerikallu avannarliup kangiata akornanni nalunaaquttat akunnerinik pingasunik nikingapput. Siunnersuutigineqartutut Kalaallit Nunaat nalunaaquttat ingerlaqatigiiffiannut UTC-3-mut ikaarsaariassappat tamatumani piffissat nikinganerit nalunaaquttap akunneranik ataatsimik sivikillineqassaaq.

Siunnersuummi aamma siunnerfigineqarpoq, Kalaallit Nunaanni sumiiffinni erseqqinnerusumik taaneqartuni allani nalunaaquttap ingiaqatigiiffiini, kitaanut naleqqiullugu allanik aalajangersaanissamut Naalakkersuisut piginnaatinneqassasut. Taamaattoq inatsimmi tunngavissaq sumiiffinnut taakkunungaannaq killeqanngilaq, kisianni nalinginnaasumik atorineqarsinnaalluni.

3. Pisortanut aningaasaqarnikkut allaffissornikkullu kingunerisassai

Siunnersuutip pisortanut aningaasaqarnikkut imaluunniit allaffissornikkut annertuumik sunniuteqarnissaa naatsorsuutigineqanngilaq.

Taamaattoq Aningaasaqarnermut Akileraartarnermullu Naalakkersuisoqarfiup tusarniaanermut akissutimini nalilerpaa nalunaaquttap ingiaqatigiiffianik allannguutip atuutilersinneqarnerata pisariaqalersissagaa IT-mi atortorissarutit nutarsarnissaannut, pilersaarutit piffissalersukkat aammalu pisortatigoortumik attaveqatigiinnerit iluarsinissaannut annertuumik sulisoqartariaqassasoq. Tassunga tunngatillugu suliassap qanoq annertutiginissaa siunnersuuteqartup oqaatigisinnaanngikkallarpaa.

Kommunini ingerlatsinermut oqartussat tusarniaanermut akissutini ilisimatitsissutigaat nalunaaquttap ingiaqatigiiffiata UTC-3-mut utertinneqarnera nunanut europiamiuusunut, ingammik Danmarkimut suleqatigiinnissamut pinngitsoorneqarsinnaanngitsumut

sunniuteqassasoq. Nunani taakkunani oqartussat allaffeqarfiisa ammanerisa nalaanni attaveqarsinnaanermut piffissatigut periarfissap annikillinissaa tamatumunnga peqqutaavoq. Massakkut nalunaaquttap ingiaqatigiiffianut (UTC-2-mut) nuunnerup suleqatigisartakkanik Kalaallit Nunaata avataaneersunik ataatsimeeqateqartarniartarnerup malunnaatilimmik ajornannginnerulersissimagaa oqaatigineqarpoq, siornatigut ataatsimiinnissamut angumersiniaraanni unnuakkut makittarnissaq pisariaqarnikuugaluartoq. Ineqarnermut Attaveqaasersuutinullu Naalakkersuisoqarfik assinganik naliliivoq.

Kommunini ingerlatsinermut oqartussat paasissutissiissutigivaattaq silaannakkut angallannermi ullormut attaveqaataasartunut periarfissat siunnersuutip annikillisissinnaagai taamaalillunilu angalanermi piffissaq atorneqartoq najugaqarnerlu eqqarsaatigalugit aningaasartuuteqarnerunissamik nassataqarsinnaalluni.

Peqqinnissaq Pillugu Kattuffiit (PPK) tusarniaanermut akissutimini paasissutissiissutigaa nalunaaquttap ingiaqatigiiffia atuuttoq malillugu Danmarkimi kalaallit peqqissartut angerlarsimaffiata aammalu napparsimaviit Danmarkimiittut suleqatigineqartartut ataatsimoorussamik suleqatigisarnerini piffissaq akunnermik ataatsimik PKK-mi ilaasortanut sivilisunerulersitsisimasooq. Ilutigisaanik aqqissuussap massakkut atuuttup naalagaaffimmi suliatigut avitseqatigiissinnaanermik ilaasortat annertunerusumik periarfissaqalersippai, kiisalu Danmarkimi peqqinnissaqarfirmut attaveqaateqarnissaq ajornannginnerulersillugu, tamannalu peqqutaalluni nakorsiat ilaannut utaqqineq sivikinnerulersimalluni.

4. Inuussutissarsiortunut aningaasaqarnikkut allaffissornikkullu kingunerisassai

Nalunaaquttap ingiaqatigiiffia massakkut atuuttumut (UTC-2) ikaarsaarneq inuussutissarsiornermut aningaasaqarnikkut allaffissornikkullu sunniuteqarluarnissaa ilimasuutigineqartoq Naalakkersuisut nalilerpaat. Tamanna tunngavigalugu nalunaaquttap ingiaqatigiiffianut (UTC-3-mut) atorunnaarnikumut uteqqinnissamut siunnersuummut ikaarsaarneq inuussutissarsiornermut aningaasaqarnikkut allaffissornikkullu pitsaanngitsunik sunniuteqarnissaa naatsorsuutigineqassaaq. Taamatut naatsorsuuteqarneq tusarniaanermut akissutit tiguneqartut uppersarsarpaat.

Ingammik Air Greenland pitsaanngitsumik kingunerisinnaasanik eqqugaanissaa naatsorsuutigineqassaaq, takuuk ataani allassimasut.

Aammattaq nalunaaquttap ingiaqatigiiffianik allannguinnissamut siunnersuut inuussutissarsiornerup ilaatigut akornuteqarsinnaassasoq oqaatigineqarpoq.

Kalaallit Nunaanni aningaasanik nuussisarnerit annerpaartaat Europamut nuunneqartartut GrønlandsBANKEN-imit paasissutissiissutigineqarpoq, nalunaaquttallu ingiaqatigiiffianik allannguinnissamut siunnersuutaasup Europami aningaaseriviit matunnginnerini nunatsinni aningaaseriviit taamatut aningaasanut nuussisarnissaat akunnermik ataatsimik

sivikinnerulersissagaa. Tamanna aamma Europami aningaasaateqarfiit niueqatigiittarfianni pappilissat nalillit atorlugit niueqatigiittarnermut atuuppoq.

Tamatuma saniatigut GrønlandsBANKEN suleqatigisartakkani Europamiut aqqutigalugit ikiorneqarnissamut neqeroorutinik arlalinnik peqarpoq. Inatsisissatut siunnersuut akuerineqassappat taamatut ikiorneqarnissamut periarfissaq akunnermik ataatsimik sivikinnerulissaaq.

Ilutigisaanik tusarniaanermut akissutini tiguneqartuni (Sulisitsisut, GrønlandsBANKEN aamma IT-mut tunngasunik suliffeqarfik Modulo ApS) allaqqavoq, nalunaaquttap ingiaqatigiiffia allanngoreernikoq massakkut atuuttoq atortorissaarutit piffissamik aqutsinermik atuisartut allanngortinnerinut ingammik IT-mut tunngasunik suliffeqarfinnut aningaaserivinnullu aningaasartuuteqarfioreersut, nalunaaquttallu ingiaqatigiiffiannik allanngueqqittoqassappat aamma taamaattoqaqqittussaasoq. Nalunaaquttap aalajangersarneqarnera pillugu Inatsisartut inatsisaanni atuuttumi inatsit pillugu nassuiaatit tunngavigalugit imaluunniit inatsisissatut siunnersuummut matumunnga tusarniaanermut akissutit tiguneqartut tunngavigalugit aningaasartuutissat taakkua qanoq annertutigissanersut annerusumik siunnersuuteqartumit oqaatigineqarsinnaasimanngilaq.

Nalunaaquttap ingiaqatigiiffianik allannguinnissamut siunnersuut ingammik Air Greenlandimut soorlu oqaatigineqareersutut aningaasartuutissat pitsaanngitsumik kinguneqarnissaa naatsorsuutigineqassaaq.

Nalunaaquttap ingiaqatigiiffiini sisamat amerlanerusulluunniit sinnerlugit timmisartuussinermi timmisartumi sulisut qasuersaartarnissaat sivilisunerussasoq nunat tamalaat akornanni timmisartuussisarneq pillugu malittarisassaasut tunngaviupput. Taamaattumik nalunaaquttap ingiaqatigiiffiini sisamat ataallugit timmisartuussinermi aningaasartuutit annikinnerupput. Nalunaaquttap ingiaqatigiiffiini arlariinni timmisartuussisoqartillugu ilaatigut kinguaattoortoqangaatsiartillugu soorlu assersuutigalugu sila peqqutaalluni kinguaattoornerni qasuersernissamut peqqussut – aammalumi aningaasartuutissat - annerulertarput.

Imarpissuaq qulaallugu timmisartuussisoqarsimatillugu Kalaallit Nunaanni timmisartup orsernissaa inuttallu unnuinnissat aqaguanilu timmisartup aallaqqinnissaa nalunaaquttap ingiaqatigiiffiata atuuttup (UTC-2) periarfissaalersippai, soorlu aamma timmisartumi inuttat Kalaallit Nunaanni najugaqarsinnaanissaannik periarfissiisoq taamaalillunilu siunissami sulisunik nunaqavissunik amerlanerusunik sulisoqarsinnaalerluni.

Nalunaaquttap ingiaqatigiiffianik allannguinnissamut siunnersuutip periarfissaq tamanna atorunnaarseqqissavaa. Tamanna Air Greenlandimut aningaasartuutitigunnaanngitsoq malitseqartussaavoq kisiannili aamma timmisartuussisarnerat killeqarnerulertussaalluni, taamaattumillu aamma ineriartornissaq annikinnerulissalluni.

Tusarniaanermut akuusut arlallit (ilaatigut Ineqarnermut Attaveqaasersuutinullu Naalakkersuisoqarfik aamma Inuussutissarsiornermut, Niuernermut, Aatsitassanut, Inatsisinik Atuutsitsinermut Naligiissitaanermullu Naalakkersuisoqarfik) tikkuussipput tamanna takornariaqartitsinermut allatut kinguneqarsinnaasoq.

Tamatuma saniatigut Aalisarnermut Piniarnermullu Naalakkersuisoqarfimmit tikkuussisoqarpoq tamanna Danmarkimut Europamullu aalisakkanik uumasunik avammut tunisassiornermut allatut kinguneqarsinnaasoq, soorlu aamma nalunaaquttap nikinganerata annikillineqarnera tamatumunnga iluaqutaanikuusoq oqaatigineqartoq. Ukioq 2024 misiliummik saattussanik sulii uumasunik, aalisakkanik sulii qerineqanngitsunik aammalu nipisaat suaanik nutaanik Kalaallit Nunaannit avammut timmisartukkut nassiussisoqarpoq, aammalu Air Greenlandimit siusinnerusukkut oqaatigineqarsimavoq 2025-miit sapaatip akunneranut 100 tons tikillugit assartuisoqartarsinnaalissasoq. Taamatut naatsorsuuteqarneq ingerlatseqatigiiffiup 2025-imut timmisartuussinissamut pilersaarutaani utaqqiisaasumik tunngaveqarpoq, tassani ingerlatseqatigiiffik nunat tamalaat akornanni Nuummumut Nuummiillu sapaatip akunneranut tallimat arfineq-marlullu akornanni amerlatigisunik timmisartuussisarluni. Air Greenlandip tusarniaanermut akissummini paasissutissiissutigaa nalunaaquttap ingiaqatigiiffianut UCT-3-mut uteqqittoqassappat taamatut timmisartuussisarnissaq ingerlaannarsinnaanngitsoq.

Tusarniaanermut akissutit tiguneqartut tunngavigalugit aasaanerani nalunaaquttap atorunnaarsinneqarnissaanik siunnersuutip inuussutissarsiortunut pingaarutilinnik ajortunik aningaasaqarnikkut allaffissornikkullu kinguneqarnissaa naatsorsuutigineqanngilaq.

Kalaallit Nunaanni aasaanerani nalunaaquttap atorunnaarsinneqarnerata taamaalilluni ukiut tamaasa piffissami marsimi sapaatip kingulliup aamma oktobarimi sapaatip kingulliup akornanni Kalaallit Nunaata EU-llu akornanni piffissat nikinganerata nalunaaquttap akunneranik ataatsimik annertusisissavaa. Nunat allat aamma aasaanerani nalunaaqutaqarfiusartut eqqarsaatigalugit Kalaallit Nunaanni aasaanerani nalunaaquttap atorunnaarsinneqarnera taamaattuttaq ukiup ilaani piffissat assigiinnginnerannut sunniuteqassaaq. Nunarsuarput tamaat eqqarsaatigalugi ullumikkut nunat 70-it missaat aasaanerani immikkut nalunaaqutaqartarput. Naatsorsuutigineqartariaqarpoq nunanik taakkuninnga Kalaallit Nunaata niueqateqarnera nunanullu taakkununnga angallannikkut attaveqarnera piffissami ilaani nalunaaquttap allanngortinneqartarneratigut killilimmik ajornarnerulersinnaassasoq.

Kalaallit Nunaanni nalunaaquttap ingiaqatigiiffia siunnersuutigineqartut UTC-3-mut allanngortinneqarpat kiisalu aasaanerani nalunaaquttap allanngortarnera atorunnaarsinneqarpat taamaalilluni piffiit ilaanni Europamut/Danmarkimut nalunaaqutaq akunnernik tallimanik nikingasalerpat, tamanna Europami aamma Danmarkimi

niueqatigiiffiillu suleqatigiinnitsinnut toqqaannartumik akornutaasinnaasoq Sulisitsisunit nalilerneqarpoq.

Danmark nunallu skandinaviamiusuusut europamiusuusullu peqatigalugit ataqatigiissagaannngitsumik aasaanerani nalunaaquttap allanngortinneqartarnera atorunnaarsinneqarpat tamanna Tusassimut pitsaavallaanngitsunik kinguneqarsinnaasoq Tusassimit nalilerneqarpoq. Tassunga atatillugu Tusassimit oqaatigineqarpoq Kalaallit Nunaanni aamma Danmarkimi nalunaaqutaq pillugu malittarisassat assigiinngitsut peqqutaallutik nalunaaquttamik aqutsiniarneq ajornarnerulissaaq aammalu Tusassip suliniutinik ataqatigiissaarisinnaassusaanut ulluinnarnilu ingerlatsiniarneranut akornutaassasoq.

IT-mut tunngasunik suliffeqarfik Modulo ApS assingusumik oqaaseqarpoq, aasaanerani nalunaaquttap allanngortinneqartarnera atorunnaarpat tamanna pisariaqanngitsumik paatsuungalersitsisinnaasoq nunallu tamalaat akornanni attaveqatigiinniarnermut ajornarnerulersitsisinnaasoq, taamaattoqassappallu tamanna innuttaasunut suliffeqarfinnullu nalunaaquttap ingiaqatigiiffiini allaneersuni qanimut suleqateqartartunut sunniuteqassasoq.

Aasaanerani nalunaaquttap allanngortinneqartarnerata atorunnaarsinneqarnissaa pillugu siunnersuummut Air Greenland erseqqissumik oqaaseqaateqanngilaq, kisiannili timmisartumi inuttat qasuersertarnissaannut nunat tamalaat akornanni malittarisassani siusinnerusukkut eqqaaneqartuni allaqqasoq aasaanerani nalunaaquttap allanngortinneqartarnera atorunnaassappat tamanna Air Greenlandimut aningaasartuuteqarnermik kinguneqassasoq Ineqarnermut Attaveqaasersuutinullu Naalakkersuisoqarfimmit ilisimatitsissutigineqarpoq.

5. Avatangiisinut, pinngortitamut inuillu peqqissusaannut kingunerisassai

Nalunaaquttat ingerlaqatigiiffiannut UTC -3-mut uteqqinnissamut siunnersuutip avatangiisinut pinngortitamullu kinguneqarnissaa naatsorsuutigineqanngilaq.

Innuttaasut peqqissusiat eqqarsaatigalugu nalunaaquttat ingerlaqatigiiffiannut UTC-3-mut uternissamik siunnersuutip pitsaasunik kinguneqarsinnaanera naatsorsuutigissallugu pissutissaqarpoq, naak tamakku annikitsuinnaassagunaraluartut.

Islandimi peqqissutsimut ministeriaqarfiup ataani suleqatigiissitap taamaalilluni 2018-imi inerniliuppaa Islandimi nalunaaquttat ingerlaqatigiiffiata piffissallu seqinnerfiusartup assigiinnginnerata napparsimalersinnaaneq annertusisittaraa, meeqqat atuartut ilikkagaqarsinnaanerat ajornarnerulsittaraa, taamatullu aamma minnerunngitsumik meeqqat inuusuttullu akornanni nanertismanermik qasunermillu eqqorneqarsinnaaneq annertunerulersittarlugu.

Aasaanerani nalunaaquttap atorunnaarsinneqarnissaanik siunnersuut CO₂-mik aniatitsinerup annertunerlerneratigut avatangiisinut pinngortitanullu ajortumik kinguneqarnissaa, taamaattoqassappalluunniit annikitsuinnarmik, naatsorsuutigineqanngilaq.

Aasaanerani nalunaaqutaqartitsisarnerup ikummatissamik sipaarniarneq eqqarsaatigalugu sunniutaa taamaalilluni killeqartorujussuurtut oqaatigineqartariaqarpoq, ullumikkummi ikummateqarnermut innaallagialaq annikinnerusoq atorneqartarmat, qulliit sipaarniutit LED-llu atorneqarnerulersimanerat pissutigalugu.

DONG Energyp 2012-imi nalilerpaa aasaanerani nalunaaqutaqartitsisarnermik aaqqissuussineq Danmarkimi innaallagissamik atuineq eqqarsaatigalugu ukiumut ataatsimut isigalugu procentip ataatsip missaannaanik sipaarutaasartoq. Ilisimasagut malillugit aaqqissuussineq ikummatissamik sipaarniarneq eqqarsaatigalugu Kalaallit Nunaanni ikummatissamik sipaartoqartarneranik malitseqarsimanersoq qulaajarniarlugu misissuinerinik ingerlatsisoqarsimanngilaq. Taamaattorli aasaanerani nalunaaquttap atorunnaarsinneqarnerata annikikkaluamik innaallagissamik atuinerinik annertunerulersitsinissaa naatsorsuutigineqartariaqarpoq.

Tamatumunnga atatillugu aamma oqaatigineqassaaq ullumikkut Kalaallit Nunaanni innaallagissap atorneqartartup 65 %-ia sinnerlugu erngup nukinganit innaallagissiorfinnit CO₂-mik aniatitsinngitsunik tunngaveqarmat.

Innuttaasut peqqissusiat eqqarsaatigalugu pissutissaqarpoq naatsorsuutigissallugu aasaanerani nalunaaquttap atorunnaarsinneqarnissaanik siunnersuut ajunngitsunik kinguneqarsinnaassasoq, naak immaqa annertunngikkaluartunik.

Ilisimatuussutsikkut misissuinerit assigiinngitsut taamaalillutik takutissimavaat piffissamik nikisitsisarneq peqqissutsikkut artukkerneqarnermik malitseqarsinnaasartoq. Sunniutaasartut tamakkua sinittarnerup akornusersorneqartarneranut timittalu ingerlasarnerata allanngortinneqarneranut attuumassuteqarsorinarput.

Assersuutigalugu University of Coloradomi ilisimatuut ukiut sisamat ingerlanerini ilisimatusarfigisimavaat aasaanerani aamma ukiuunerani nalunaaquttamut ikaarsaarnissaq sioqqutitsiarlugu taamatullu ikaarsaarnerup kingunitsiannguaq ataasinngornermi qassit napparsimavimmut unittarnerut. Misissuinerimi 2014-meersumi, paasineqarpoq aasaanerani nalunaaquttamut ikaarsaarnerup kingorna ataasinngornikkut 24 procentinik amerlanerusut uummatimikkut ajoquteqalernissaat qaninnerusarsimasoq allanut ataasinngornernut naligninnaasunut naleqqiullugu. Paarlattuanik ukiukkut nalunaaquttamut ikaarsaarnerup kingorna ataasinngornikkut uummallulersartut 21 %-nik ikinnerusarsimapput - tassani ulloq nalunaaquttap akunneranik ataatsimik sivisunerulertarpoq.

Aamma oqaatigisinnaavarput Karolinska Instituttip 2018-mi atugassiami New England Journal of Medicinemi misissuina saqqummersinneqarnikuusoq. Tassani misissuinerimi takutinneqarpoq aasakut nalunaaquttamut ikaarsaernerup kingorna sapaatip akunnerani siullermi agguaqatigiisillugu 5 procentinik amerlanerusut uummamminni taqarsuarminnik milikartoortarsimasut. Paarlattuanilli ukiukkut nalunaaquttamut ikaarsaernerup kignorna ataasinngornerup qaangiunnerani uummamminni taqqamikkut milittoortartut ikisarsimapput. Ataatsimut isigalugu ukiukkut nalunaaquttamut ikaarsaernerup nalaani ajutoornissaq ungasinnerulaarnera minnerulaarpoq aasaanerani nalunaaquttamut ikaarsaernerup nalaani ajutoornissamut naleqqiullugu.

Aasaaneranut ikaarsaernerup kingunerip pillugit misissuinerit tamarmiunngillat assortorneqarsinnaanngitsumik takutitsisut, misissuinerillu ilaat assortuussutaapput.

6. Innuttaasunut kingunerisassai

Inatsisartut inatsisaata ulloq 24. oktober 2026, nal. 24.00 atuutilerneratigut Kalaallit Nunaat ataavartumik ukiuunerani nalunaaqutaqarnermut (nalinginnaasumik nalunaaquttamut) ikaarsaariassaaq peqatigitillugu nalunaaquttat ingerlaqatigiiffiannit UTC-2-mit UTC-3-mut ikaarsaariassalluni.

Nalunaaqutaq taamaattumik ulloq 24. oktober 2026, nal. 24.00 nalunaaquttap akunnerinik marlunnik kinguartinneqartariaqassaaq nal. 22.00-nngorlugu.

Nalunaaquttat ingerlaqatigiiffiannit UTC-2-mit UTC-3-mut ikaarsaariarnissamik siunnersuutikkut, taamatullu aamma aasaanerani nalunaaquttap atorunnaarsinneqarnissaanik siunnersuutikkut – ukioq tamaat ataatsimut isigalugu – ullaakkut ullup qeqqata siorna qaamasarnera annertusissaaq taamaaqataanillu ualikkut unnukkullu qaamasarnera annikillilluni.

Peqqissutsimut Naalakkersuisoqarfiup siunnersuummut matumunnga tusarniaanermi akissummini paasissutissiissutigaa nalunaaquttap akunneri ualikkut/unnukkut qaamaffiusut innuttaasut nalunaaquttap akunneri silami sammisaqarfigisaat annertusissinnaagaat ilisimatusarnerit takutikkaat.

Akerlianik aasaanerani nalunaaquttap atorunnaarsinneqarnissaanik siunnersuutip malitsigissavaa innuttaasut sininniarnikkut ajornartorsiuteqarnerup timittalu ingerlanerata allanngortinneqarnerata malitsigisaanik aasaanerani ukiuuneranilu (nalinginnaasumik) nalunaaquttap nikisinneqartarneranik akornusersorneqarunnaarnerat.

7. Kingunerisinnaasai pingaarutillit allat

Siunnersuutip pingaarutillinnik allanik kinguneqarnissaa naatsorsuutigineqanngilaq.

8. Oqartussanik suliniaqatigiiffinnillu il.il. tusarniaaneq

Siunnersuut piffissami 2024-mi 10. julimit 5. augustimut Inatsisartut nittartagaanni tamanut ammasumik tusarniaassutigineqarpoq.

Tamatuma saniatigut uku toqqaannaq siunnersuummik nassiussivigineqarsimapput:

Oqartussat: Naalakkersuisut Siulittaasuata Naalakkersuisoqarfia, Aningaasaqarnermut Akileraartarnermullu Naalakkersuisoqarfik, Inuussutissarsiornermut, Niuernermut, Aatsitassanut, Inatsisinik atuutsitsinermit Naligiissitaanermullu Naalakkersuisoqarfik, Naalagaaffinngornissamut Nunanullu allanut Naalakkersuisoq, Meeqqanut Inuusuttunullu Naalakkersuisoqarfik, Ilinniartitaanermut, Kulturimut, Timersornermut Ilageeqarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Nunalerinermit, Imminut pilersornermut, Nukissiornermut Avatangiisinullu Naalakkersuisoqarfik, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik, Peqqissutsimut Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Kommune Kujalleq, Kommuneqarfik Sermersooq, Qeqqata Kommunian, Kommune Qeqertalik, Avannaata Kommunian, Naalagaaffiup Kalaallit Nunaanni sinniisaa.

Suliffeqarfiit: Air Greenland, Inissiaatileqatigiiffik INI, Great Greenland, Greenland Oil Spill Response, Nalik Ventures, Illuut, KNI, NunaGreen, Royal Arctic Line, Royal Greenland, Tusass, Visit Greenland, BankNordik, GrønlandsBANKEN, Polar Seafood, Inu:IT, Comby, Permagreen.

Kattuffiit allallu: Kalaallit Nunaanni Aalisartut Piniartullu Kattuffiat (KNAPK), Qaleralinniat Aalisagarniallu Kattuffiat (QAK), Sinerissap Qanittuani Aalisartut Piniartullu Kattuffiat (SQAPK), Sulisitsisut, Ilinniagartuut Kattuffiat (ASG), Ilinniartitsisut Meeqqat Atuarfianneersut Kattuffiat (IMAK), Nunatsinni Perorsaasut Kattuffiat (NPK), Peqqinnissaq Pillugu Kattuffiit (PPK), Sulinermit Inuussutissarsiuteqartut Kattuffiat (SIK), Sulisunik Siulersuisut Kattuffiat (SSK).

Tusarniaanermi akissutit taakku pillugu allakkiami sammineqarput. Ilanngussaq 2 innersuussutigineqarpoq.

Siunnersuummi malittarisassanut ataasiakkaanut nassuiaatit

§ 1-imut

Aalajangersakkami Inatsisartut inatsisaanni atuuttumi § 1, imm. 1-2 ingerlateqqinneqarput, taamaattorli Kalaallit Nunaannut nalunaaquttamut malitassaq aamma nalunaaquttat ingerlaqatigiiffiat nalinginnaasoq UTC-3-mut allanngortinneqarluni.

Aalajangersakkakkut Inatsisartut inatsisaanni atuuttumi § 1, imm. 3 taamatuttaaq ingerlateqqinneqarpoq, allannguutigaluguli matumani Naalakkersuisut taamaallaat piginnaatinneqarmata Danmarkshavn aamma Pituffik Space Base eqqarsaatigalugit aasaanerani nalunaaqutaq pillugu malittarisassiorsinnaanissaminut. Taamaalilluni Kalaallit Nunaata immikkoortuinut allanut aasaanerani nalunaarutaq atorunnaarsinneqassaaq.

§ 1, imm. 1-imut

Imm. 1-imi aalajangersarneqarpoq Kalaallit Nunaannut nalunaaquttap nalinginnaasup nalunaaquttamut malitassaq aamma nalunaaquttat ingerlaqatigiiffiat UTC-3 malissagaa. Ullumikkut taanna UTC-2-uvoq.

§ 1, imm. 2-mut

Sumiiffinni erseqqinnerusumik taaneqartuni nalunaaquttat ingerlaqatigiiffiannit nalinginnaasumit UTC-3-mit nalunaaquttat ingerlaqatigiiffiata allap malinneqarnissaa pillugu maleruagassanik aalajangersaasinnaanermut Naalakkersuisut piginnaatinneqarnerat atuuttoq imm. 2-mi ingerlateqqinneqarpoq.

Piginnaatitsissut atuuttoq tunngavigalugu Naalakkersuisut nalunaarusiorsimapput: Danmarkshavnimi aamma Pituffimmi (Thule Air Base) nalunaaquttap ingiaqatigiiffianik aalajangersagaq aammalu aasaanerani nalunaaquttap atuusinnaanera pillugit Namminersorlutik Oqartussat nalunaarutaat nr. 8, 24. marts 2023-meersoq.

Taamaalilluni ullumikkut sumiiffiit marluk nalunaaquttat ingerlaqatigiiffiannit nalinginnaasumit ullumikkut UTC-2-usumit nalunaaquttat ingerlaqatigiiffiannik allamik malitaqarput. Tamatumani pineqarput Danmarkshavn nalunaaquttat ingerlaqatigiiffiannik UTC+0-mik malitaqartoq aamma Pituffik Space Base nalunaaquttat ingerlaqatigiiffiannik UTC-4-mik malitaqartoq. Sumiiffinnut pineqartunut nalunaaquttat ingerlaqatigiiffisa allanngortinneqarnissaat eqqarsaatigineqanngilaq.

§ 1, imm. 3-mut

Aalajangersakkakkut Naalakkersuisut piginnaatinneqarput Danmarkshavnimi aamma Pituffik Space Base-imi aasaanerani nalunaaqutaq pillugu malittarisassanik aalajangersaasinnaanerminnut.

Piginnaatitsissutip taamatut oqaasertalerneqarsimaneratigut Kalaallit Nunaata ilaanut allanut Kalaallit Nunaannulluunniit tamarmiusumut aasaanerani nalunaaqutaq pillugu malittarisassanik Naalakkersuisut aalajangersaasinnaassanngillat.

§ 2-mut

Imm. 1-imut

Inatsisartut inatsisaata ulloq 24. oktober 2026, nal. 24.00 atuutilernissaa siunnersuutigineqarpoq.

Imm. 2-mut

Inatsisartut inatsisaata matuma atuutilerneratigut Aasaanerani nalunaaqutaq pillugu Namminersorlutik Oqartussat nalunaarutaat nr. 15, 27. marts 2024-meersoq atuukkunnaarsinneqarpoq.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	§ 1 Nalunaaquttap aalajangersarneqarnera pillugu Inatsisartut inatsisaanni nr. 31-mi 25. november 2022-meersumi tulluuttut allanngortinneqarput:
§ 1. Kalaallit Nunaannut nalunaaquttamut nalinginnaasumut nalunaaquttamut malitassaq aamma nalunaaquttat ingerlaqatigiiffiat UTC -2 malinneqarpoq. <i>Imm. 2.</i> Sumiiffinni erseqqinnerusumik allanneqartuni nalunaaquttat ingerlaqatigiiffiat alla imm. 1-imi aalajangersarneqartunit allaanerusoq malinneqassasoq pillugu maleruagassanik Naalakkersuisut aalajangersaasinnaapput. <i>Imm. 3.</i> Naalakkersuisut aasaanerani nalunaaqutaq pillugu maleruagassanik aalajangersaasinnaapput.	1. § 1 imatut oqaasertalerneqarpoq: ” § 1. Kalaallit Nunaannut nalunaaquttap nalinginnaasup nalunaaquttamut malitassaq aamma nalunaaquttat ingerlaqatigiiffiat UTC-3 malippaa. <i>Imm. 2.</i> Sumiiffinni erseqqinnerusumik taaneqartuni nalunaaquttat ingerlaqatigiiffiat alla imm. 1-imi aalajangersarneqartunit allaanerusoq malinneqassasoq pillugu maleruagassanik Naalakkersuisut aalajangersaasinnaapput. <i>Imm. 3.</i> Danmarkshavnimi aamma Pituffik Space Base-imi aasaanerani nalunaaqutaq pillugu malittarisassanik Naalakkersuisut aalajangersaasinnaapput.”
	§ 2 Inatsisartut inatsisaat una ulloq 24. oktober 2026, nal. 24.00 atuutilerpoq. <i>Imm. 2.</i> Aasaanerani nalunaaqutaq pillugu Namminersorlutik Oqartussat nalunaarutaat nr. 15, 27. marts 2024-meersoq peqatigitillugu atuukkunnaarsinneqarpoq.

Tusarniaaneq pillugu allakkiaq

Oqartussanik suliaqatigiiffinnillu il.il. tusarniaaneq

Inatsisissamut missingiut piffissami 2024-mi 10. julimit 5. augustimut Inatsisartut nittartagaanni tamanut tusarniaatigineqarsimavoq.

Inatsisissatut missingiut taamatuttaaq oqartussanut suliniaqatigiiffinnillu il.il. tuliuttunit tusarniaatigineqarsimavoq:

Oqartussat: Naalakkersuisut Siulittaasuata Naalakkersuisoqarfia, Aningaasaqarnermut Akileraartarnermullu Naalakkersuisoqarfik, Inuussutissarsiornermut, Niuernermut, Aatsitassanut, Inatsisinik atuutsitsinermit Naligiissitaanermullu Naalakkersuisoqarfik, Naalagaaffinngornissamut Nunanullu allanut Naalakkersuisoq, Meeqqanut Inuusuttunullu Naalakkersuisoqarfik, Ilinniartitaanermut, Kulturimut, Timersornermut Ilageeqarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Nunalerinermit, Imminut pilersornermut, Nukissiornermut Avatangiisinullu Naalakkersuisoqarfik, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik, Peqqissutsimut Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Kommune Kujalleq, Kommuneqarfik Sermersooq, Qeqqata Kommunian, Kommune Qeqertalik, Avannaata Kommunian, Naalagaaffiup Kalaallit Nunaanni sinniisaa.

Suliffeqarfiit: Air Greenland, Inissiaatileqatigiiffik INI, Great Greenland, Greenland Oil Spill Response, Nalik Ventures, Illuut, KNI, NunaGreen, Royal Arctic Line, Royal Greenland, Tusass, Visit Greenland, BankNordik, GrønlandsBANKEN, Polar Seafood, Inu:IT, Comby, Permagreen.

Kattuffiit allallu: Kalaallit Nunaanni Aalisartut Piniartullu Kattuffiat (KNAPK), Qaleralinniat Aalisagarniallu Kattuffiat (QAK), Sinerissap Qanittuani Aalisartut Piniartullu Kattuffiat (SQAPK), Sulisitsisut, Ilinniagartuut Kattuffiat (ASG), Ilinniartitsisut Meeqqat Atuarfianneersut Kattuffiat (IMAK), Nunatsinni Perorsaasut Kattuffiat (NPK), Peqqinnissaq Pillugu Kattuffiat (PPK), Sulinermit Inuussutissarsiteqartut Kattuffiat (SIK), Sulisunik Siulersuisut Kattuffiat (SSK).

Siunnersuuteqartoq oqartussanit suliniaqatigiiffinniillu il.il. tuliuttunit tusarniaanermit akissuteqaatinik tigusaqarpoq:

Aningaasaqarnermut Akileraartarnermullu Naalakkersuisoqarfik, Inuussutissarsiornermut, Niuernermut, Aatsitassanut, Inatsisinik atuutsitsinermit Naligiissitaanermullu Naalakkersuisoqarfik, Meeqqanut Inuusuttunullu Naalakkersuisoqarfik, Ilinniartitaanermut, Kulturimut, Timersornermut Ilageeqarnermullu Naalakkersuisoqarfik, Kommune Kujalleq,

Kommuneqarfik Sermersuumi Meeqqanut Atuarfeqarnermullu Ingerlatsivik, Kommuneqarfik Sermersuumi Sanarfinermut Avatangiiisinnullu Ingerlatsivik, Kommuneqarfik Sermersuumi Suliffeqarnermut Isumaginninnermullu Ingerlatsivik, Air Greenland, Inissiaatileqatigiiffik INI, GrønlandsBANKEN, Tusass, Modulo ApS, Sulisitsisut, Peqqinnissaq Pillugu Kattuffiit (PPK), Andu Schiødt Pikilak (innuttaasoq), Birthe Josvassen (innuttaasoq), Hans-Kristian Petrussen (innuttaasoq), Hennie Nielsen Lange (innuttaasoq), Bikki Kleist Jepsen (innuttaasoq), Klara Rosing (innuttaasoq), Susanne Høegh (innuttaasoq), Tuperna Heinrich (innuttaasoq), kiisalu Ulla Lynge Heilmann (innuttaasoq).

Siunnersuuteqartoq tusarniaanermi akissutitut tiguneqartunut qujavoq.

Tulliuttut siunnersuummut oqaaseqaatissaqarsimanngillat:

Meeqqanut Inuusuttunullu Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik kiisalu Inissiaatileqatigiiffik INI.

Oqaaseqaatit tiguneqartut ataani naqinnerit nalinginnaasut atorlugit issuarneqarsimapput, siunnersuuteqartup oqaaseqaatai naqinnernik uingasunik allanneqarsimallutik.

1. Aningaasaqarnermut Akileraartarnermullu Naalakkersuisoqarfik

1.1. Aningaasaqarnermut Akileraartarnermullu Naalakkersuisoqarfiup oqaatigaa nalunaaquttap aalajangersarneqarnera 2022-mi novemberimi akuerineqartoq aammalu aatsaat ulloq 28. oktober 2023-mit piviusumik sunniuteqalersoq. Taamaalillunilu nalunaatuttat ingerlaqatigiiffiat allanngortitaq maanna atorneqartoq qaammatinit qulinit ikinnerusunit taamaallaat atuuppoq. Tamanna tunngavigalugu nalunaaquttat ingerlaqatigiiffiata taama pilertortigisumik allanngortinneqarnissaata aalajangerneqarnissaa tuaviuussivallaarnerusorinarrpoq.

Piffissap taama sivikitsigisup iluani nalunaaquttat ingerlaqatigiiffiannik allanngueqqittoqassappat tamanna Kalaallit Nunaanni innuttaasut nunatsinnilu inuussutissarsiortut akornanni ularussisoqarneranik eqqissiviilliortoqarneranillu nassataqarsinnaavoq. Nalunaaquttat ingerlaqatigiiffiata allannguutaanut tamatta naleqqussarniarsarisimavugut, siunnersuullu akuerineqassappat pissutsit ersarinngissorinartut pissutigalugit aammaarluta tamatta naleqqussaqqissaagut.

Nalunaatuttap ingerlatseqatigiiffiata allannguutaanut inuttut qanoq naleqqussartarnerput assigiinngilaq. Ilaasa naleqqussarneq allanut sanilliullutik ajornakusoortutittarpaat. Sungiussinittali kingorna nalunaaquttat ingerlaqatigiiffiat nutaaq ingerlaasitsinnut aalajangersimasumik ilaaginnersoq. Taamaattumik inuppassuit nalunaaquttat ingerlaqatigiiffiannik nutaamik ajornakusoortumik misigisaqarnerarlugit inatsisissatut siunnersuummut nassuiaatini tunngavilersuut paasiuinaappoq. Inuit taakkorpiat

nalunaaquttat ingerlaqatigiiffiannik allannguisoqarneranik aammaarlutik misigisaqarunik tamanna ajornakusoortissagaat ilimanaateqarluarpoq.

Naalakkersuisoqarfiup oqaaseqaatai paatsoornermik tunngaveqarsorinarput. Nalunaaquttat ingerlaqatigiiffiannik nutaamik innuttaasut sungiussiniarneranni pitsaanngitsumik (piffissami sivikitsuinnarmi) kinguneqartitsivigineqarnissaat siunnersuuteqarnermi anguniarneqanngilaq. Nalunaaquttat ingerlaqatigiiffiata (ataavartumik) kingunerisaat piffissamit seqinnerfiusumit (nalunaaquttat ingerlaarfiannit "nalinginnaasumit") allaanerusut siunnersuummi siunnerfigineqarput.

1.2. Internetikkut isummanik takutitsineq tunngavigalugu inuit 2.700-t nalunaaquttat ingerlaqatigiiffiata UTC-3-p atuutleqqinnissaanik kissaaateqarsimanerat inatsisissatut siunnersuummi innersuussutigineqarpoq. "Influencer"-imit (sunniiniartartumik) taaneqartartumit siulersorneqartumik internetikkut paasititsiniaaneq, tamat oqartussaaqataaneranni inatsisartutigoortumilluunniit sutigulluunniit nakkutilliivigineqanngitsoq taama ittoq aalajangiinnermi sutigulluunniit tunngavigineqarsinnaanngilaq. Isummanik takutitsineq nalunaaquttat ingerlaqatigiiffiannik allannguinnisaq pillugu isumaqataasut akerliusulluunniit naligiimmik oqaaseqartillugit oqallinnermik assigiinngisitaartumik siuarsaaniarnermik pilersitsiniarfiunngilaq. Akerlianilli allannguneq ingerlanneqareersoq isummanik takutitsinnermi illiunnaasiortumik akerlilerneqarpoq. Nalunaaquttat ingerlaarfiata allanngorneqarnera ingerlanneqareersoq annertuumik unalligassaqartitsisoq inuit amerlasuut isumaqarpata atsiorerit amerlanerungaatsiarsimassagaluartut naatsorsuutigineqartariaqarpoq.

Atsiornernik katersuisitsineq tusagassiorfinnit allaaserineqangaatsiarpoq, taamaattumillu atsiornernik amerlanernik katersuisoqanngitsoorneranut tamanna pissutaarpiarnaviannngilaq. Taamaattumillu apeqqutigissallugu pissusissamisoorpoq amerlasoorpassuit kissaatigineqartumut atsiunngitsut nalunaaquttat ingerlaqatigiiffiannik nutaamik akuerinnereersimanersut allaalluunniit akuersaartumik tiguisisimanersut? Tamanna eqqoriarneqarsinnaanngilaq, nassuiaatigissalluguli atorluarneqarsinnaasorinarluni.

Tamatuma saniatigut inuit namminneq aalajangiisinnaassusillit Kalaallit Nunaanni aalajangersimasumik najugallit imaluunniit Kalaallit Nunaannut attuumassutillit kisimik atsiornersut atsiornernik katersuisitsinnermi sillimaffiginiarneqarsorinanngilaq. Taamaalilluni inuit nunani allani najugallit imaluunniit Kalaallit Nunaannut aalajangersimasumik attuumassuteqanngitsut atsiorsimanissaat ilimanaateqarluinnarpoq.

Nalunaaquttat ingerlaqatigiiffiannik aammaarluni allannguneq inuiaqatigiit pingaarnerusutigut ingerlaasiannut aqqissugaanerannullu pitsaanngitsumik sunniuteqassaaq, tamatumalu namminersortut pisortallu suliffeqarfiutaasa pilersaarusiorniarnarat iliuseqarniarneralu ajornakusoortilissavaa.

Naalakkersuisoqarfik isumaqarpoq, tamatumani ikinnerussuteqartunit ikitsuinnarnit inuillu ataasiakkaat nittartakkatigut attaveqatigiittarfinni inatsisartutigoortumik pisortatigoortumilluunniit nakkutilliivigineqanngitsumik sunniiniarnerannit aqqissuusaasumillu isummaminnik takutitsinerannit aqunneqarnani innuttaasut tamarmiusut kissaataannik pisariaqartitaannillu eqqumaffiginnilluni aalajangiinerni taamaattuni sukumiisumik sinniillunilu aalajangiinissamut tunngavissaq tunngavigineqartariaqartoq. Tamatuma tamat oqartussaaqataaneranni tunngavigisassat ataatsimoortumillu aalajangeeriaaseqarneq qajannarsisippaa.

Innuttaasut inuiaqatigiinni pisut pillugit oqallinnerni – tassungalu ilanngullugu atsiornernik katersuisitsinerit aqqutigalugit – peqataanerat tamat oqartussaaqataaneranni tunngavissatut nalilittut siunnersuuteqartumit igineqarpoq.

Atsiornernik katersuisitsinerit inatsisiliornissamik pissaateqartut aalajangiiniarneranni kisimik soorunami tunngavigineqarsinnaanngillat: Innuttaasut kissaataat inuiaqatigiinni eqqarsaatigineqartariaqartunut pingaarutilinnut allanut akuttunngitsumik oqimaaqatigiissaarneqartariaqarput. Siunnersuummut isumaqataasut eqqarsaatigineqarnisaaat siunnersuummullu akerliusut eqqarsaatigineqarnisaaat inatsisissatut siunnersuummut pineqartumut nassuiaatini nassuiaatiginarneqarsimavoq, soorluttaaq kingunerisassat pitsaasut pitsaanngitsullu siunnersuutip kingunerisinnaasaasa allaaserineqarnerini ilanngunneqartut. Tusarniaanermi akissutit tiguneqartut taakkununga ilanngussipput. Taamaalilluni Inatsisartut aalajangiinissaminni siunnersuutikkut assigiinngisitaartumik tunngaviusumillu tunngavissinneqartut siunnersuuteqartoq isumaqarpoq.

Atsiornernik katersuisitsineq innuttaasut kissaataat pillugit ilisimatusarnikkut atorluarneqarsinnaasumik takutitsisuunngimmat siunnersuuteqartup isumaqatigaa. Aammattaaq ilumoorpoq atsiortut – qanorluunniit amerlatigigaluarunik – innuttaasuni taamaallaat ikinnerussuteqartuunerat, taamaalillutillu innuttaasuni amerlanerussuteqartut nalunaaquttat ingerlaqatifiiggita allanngortinneqarnissaanik siunnersuummut tunngaviusumik isigalugu akerliussaqaqangatinneqarsinnaapput. Atsiornernilli katersuisitsinerup pineqartup takutippaa nalunaaquttat ingerlaqatigiiffiat maanna atuuttoq innuttaasunit amerlasuunit ajornakusoortututmisigineqartarnera.

Islandimi taamaaqataanik misilittagaqarput, tamatumani nalunaaquttat ingerlaqatigiiffiat piffissamit seqinnerfiusumit aammattaaq allaanerulluni. Tamatumani misissuinerup Islandimi naalakkersuisunit ingerlanneqartup takutillugu aperineqartut 1.600-t 56%-iisa nalunaaquttap akunneranik ataatsimik kinguartinnissaa kissaatigalugu (taamaalilluni nalunaaruttat ingerlaqatigiiffiata piffissaq seqinnerfiusoq malillugu) aammalu 35%-iisa allannguisoqannginnissaa kissaatigalugu.

1.3. Nalunaaquttat ingerlaarfiat aammaarlugu allanngortinneqassagualuarpat tamatuma kingunerisassaa alla ilungersungartorlu tassaavoq timmisartumik angallannermi unammilligassat annertusinissaat. Piffissat eqqissisimaarfigisassat pillugit aalajangersakkat malillugit inuttat taarseraattarnerisa annertusinerat timmisartortitsisoqatigiiffinnut ilaasunullu pisariaqanngitsumik kingunaattoortitsinermik nassataqassaaq aningaasartuutinillu annertusisitsissalluni. Tamatuma Kalaallit Nunaata ornikkuminartuunera kajungernartuuneralu annikilliseriaqqissavai immaqalu aningasaqarnikkut ineriartornermut takornariartitsinermullu ajoqusiissalluni.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

1.4. Nalunaaquttat ingerlaqatigiiffiannik allanngueqattaarnerup aningaasaqarnikkut allaffissornikkullu sunniutai annikigisassaangillat. Nalunaaquttat ingerlaqatigiiffiannik allannguinerup piviusunngortineqarnerani sulisut aningaasallu amerlasoorujussuit atorineqartariaqarput, tamatuma ilaatigut qarasaasiakkut periutsit maani nunanilu allani nutarterneqassallutik, piffissamik pilersaarutit pisortanullu attaveqarfiit iluarsineqassallutik. Sulisut aningaasallu taakku suliassaqarfinni allani innuttaasut inuuniarnikkut atugaannik toqqaannertumik pitsanngorsaataasumik atorluarneqarsinnaagaluarput.

Tusarniaanermi akissutit siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarput.

1.5. Innuttaasut isumaat sukumiisumik sinniillunilu siumoortumik misissueqqaarnani kiisalu siunissami ungasinnerusumi kingunerisassanik nalilersueqqaarnani nalunaaquttat ingerlaqatigiiffiannut pioqqaarsimasunut uteqqittoqannginnissaa Naalakkersuisoqarfiup kaammattuutigaa.

Pisariaqanngitsumik akornusersuinerit aningaasartuuteqarnissallu pinngitsoortinniarlugit patajaallisaanissap atajuartitsinissallu qulakkeerneqarnissaat pingaaruteqarpoq.

Aalajangigassat taamaattut eqqarsaatigilluaqqaarlugit aammalu innuttaasut tamarmiusut pisariaqartitaat kissaataallu ataqqillugit aalajangerneqartariaqarput.

Siunnersuutip siunissami qaninnermi ungasinnermilu kingunerisassai tusarniaaneq ingerlanneqartoq aqutigalugu nassuiarniarneqarsimapput.

Innuttaasut nalunaaquttat ingerlaqatigiiffiat pillugu apeqqummut isumaannik sinniilluni misissuinerimik misissueqqissaarisooqarfinnik misissuisitsisoqarnissaanik Naalakkersuisut kissaateqassagualuarpata tamatumunnga akerliliinissani siunnersuuteqartup tunngavissaqartinngilaa, taamaalilluni paasisat inatsisissatut siunnersuutip pineqartup ataatsimiititaliami suliarineqarnissaanut ilaatinneqarsinnaaniassammata.

2. Inuussutissarsiornermut, Niuernermut, Aatsitassanut, Inatsisinik atuutsitsinermut Naligiissitaanermullu Naalakkersuisoqarfik

2.1. Inuussutissarsiornermut, Niuernermut, Aatsitassanut, Inatsisinik atuutsitsinermut Naligiissitaanermullu Naalakkersuisoqarfiup ilimagaa allannguutissatut siunnersuutigineqartoq takornariartitsinerмик suliassaqarfimmut toqqaannanngitsumik sunniuteqarsinnaasoq.

Air Greenland nalunaaquttat ingerlaqatigiiffiannut UTC-2-mut allannguinnissaq tigulluarpaa, tamanna pingaartumik Air Greenlandip imarpik qulaallugu timmisartuussineranut iluaquteqassammat. Nalunaaquttat ingerlaqatigiiffiat UTC-3 atorineqaleqqissagaluarpat Air Greenlandip kiisalu mittarfinnut nutaanut atatillugu timmisartortitsoqatigiiffiit allat pilersaarutiminnik allannguisariaqarnissaat naatsorsuutigineqarpoq. Air Greenland aammalu timmisartortitsoqatigiiffiit allat sunnerneqarnissaat naatsorsuutigineqarmat nalunaaquttat ingerlaqatigiiffiata allanngortinneqarnissaanik siunnersuut takornariartitsinerмик inuussutissarsiuteqartunut allanut toqqaannanngitsumik sunniuteqarsinnaavoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

2.2. Naalakkersuisoqarfiup oqaatigaa nalunaaquttat ingerlaqatigiiffiannut UTC-2-mut siusinnerusukkut allannguinerup siunertarisimagaa piffissaq eqqarsaatigalugu Danmarkimut Europamullu qaninnerulernissaq, taamaaliornikkullu suleqatigisat niuernikkut annertunerusumik suleqatigisinnaalernissaat. Taamaalilluni nalunaaquttat ingerlaqatigiiffiannik UTC-3-mik atueqqilerneq niuernikkut suliassaqarfiup, aqqissuussinerup aqutsinerullu aammalu aningaaserivinnut attaveqarnerup iluini ajornartorsiutinik nassaqataqarsinnaavoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

2.3. Naalakkersuisoqarfiup aasaanerani nalunaaquttap atorunnaarsinneqarnissaa pitsaasutut isigaa, tassa aasaanerani aqqissuussineq ulluinnarni inuunermut pitsaasumik sunniuteqarunnaartoq Naalakkersuisoq isumaqarmat.

3. Aalisarnermut Piniarnermullu Naalakkersuisoqarfik

3.1. Aalisarnermut Piniarnermullu Naalakkersuisoqarfiup oqaatigaa Kalaallit Nunaanni inuiaqatigiit mittarfiliortiternermut ukiuni kingullerni annertooujussuarmik aningaasaliisimasut aningaasaliinerup innuttaasunut iluaqutaanissaa imminullu kilersinnaanissaa naatsorsuutigalugu. Kingullertut taaneqartoq ilaatigt nalunaaquttat ingerlaqatigiiffiannit UTC-3-mit UTC-2-mut allanngortinneqarneranut qulakkeerneqarsinnaassaaq.

Nalunaaquttat ingerlaqatigiiffiannit UTC-3-mit UTC-2-mut allanngortinneqarnera mittarfiliortiternernut maanna ingerlanneqartunut aalajangiinissamut tunngavigineqartunut ilaatinneqarsimanera siunnersuuteqartumit ilisimaneqanngilaq. Tamanna nalunaaquttap aalajangersarneqarnera pillugu Inatsisartut inatsisaanni atuuttumi inatsimmut nassuiaatini aamma oqaatigineqanngilaq.

3.2. Taamaaattumik nalunaaquttat ingerlaqatigiiffiata allanngortinneqarnissaa pillugu inatsissatut siunnersuutaqqaartoq Sulisitsisunit aammalu Air Greenlandimit taperserneqarsimavoq, tamatumani timmisartortitsisoqatigiiffimmut mittarfinnillu ingerlatsitsisoqatigiiffinnut allanut siunissami nunatsinni angallassisartusssanut iluaqutissartai arlallit Air Greenlandimit tikkuarneqarlutik. Tamatumami nassatarissammagu ingerlatseqatigiiffiup imarpik qulaallugu nammineq timmisartuutaata sineriammi silarlutsillugu ilaasussanut persaqquersorsuutaasut annikinnerulersillugit timmisartuussisinnaassammat, tassa imarpik qulaallugu timmisartuq nunami maani timmisartumik angallassisut utaqqeqaartariaqartarunnaarlugit ullup angallassiffiusussap tullianut kingunerluutitaqannginnerusumik aallajaarnerusalissammat sullitanullu persaqquersuutit annikinnerulissallutik.

Inatsimmik (nalunaaquttat ingerlaqatigiiffiannut UTC-3-mut) allannguisoqarnera sioqqullugu inuttat Kangerlussuarmi Københavnimut aallannginnermini sivikinnerpaamik nalunaaquttap akunnerini 14-ini qasuersaartinneqartarnissaat inuttallu Københavnimut tikinnermik kingorna sivikinnerpaamik unnunni pingasuni qasuersaaqqaartarnissaat pisariaqarsimasoq imarpik qulaallugu timmisartuq nalunaaquttap akunnerisa assigiinngissutaat pingasut malillugit Kangerlussuarmi taamaallaat nalunaaquttap akunnerini qulini utaqqisalissapput, tamatumalu kingorna inuttat timmisartorsinnaaqqilernissaminnut taamaallaat unnuk ataaseq qasuersaarsinnaalissallutik. Tamanna ilaasunut iluaqutaallunilu ingerlatseqatigiiffik eqaatsumik ingerlatsisinnaanerulissaaq.

Nalunaaquttat ingerlaqatigiiffiannut UTC-2-mut allannguneq kitaanut timmisartuussinernut aamma iluaqutaassaaq, tassa Nuummi Ilulissanilu mittarfiit nutaat Amerikap avannaanut timmisartumik angalanisamut periarfissiissammata, tamannalu inuussutissarsiutilinnut iluaqutaassalluni. Europamut sanilliullugu nalunaaquttap akunnerinik pingasunik nikingassuteqarnikkut aammalu Amerikap avannarliup kangimut sineriaanut nalunaaquttap akunnerinik pingasunik nikingassuteqarnikkut Amerikap avannarlernut Europamullu timmisartuussinermi ataatsimut ataqatigiissaarinermi timmisartumi inuttanik pisariaqartitsineq nalunaaquttap akunnerinik sisamanik nikingassuteqarnermit annikinnerussaaq.

Kiisalu nalunaaquttat ingerlaqatigiiffiat ullumikkut atuuttoq, tamatumani Danmarkimut Europamullu piffissap nikingassutaa nalunaaquttap akunnerinut pingasunut sivikillilluni, Air Greenlandip Danmarkimi Europamilu silaannakkut timmisartuussinermut oqartussanut attaveqarneq eqqarsaatigalugu ”piffissaq allaffissornermut atortagaa” nalunaaquttap akunnerata missaanik sivitsussaaq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

3.3. Kiisalu aalisakkanik sulì uumasunik Danmarkimut Europamullu avammut niuerneq annertusiartortoq naalakkersuisoqarfimmit maluginiarneqarpoq, taakku timmisartumik assartorneqartarlutik aammattaarlu piffissap nikinganerata annikillineranit iluaquserneqarlutik.

Siunnersuuteqartup maluginiarpaa saattuanik sulì uumasunik, aalisakkanik suliareqqitaanngitsunik nipisaallu suaannik Kalaallit Nunaannit timmisartukkut assartorlugit nassiullugit ukioq manna miligarneqartoq aammalu aappaagu nipisaat suaannik sapaatip akunneranut 100 tonsit angullugit assartuisinnaanissani Air Greenlandimit naatsorsuutigineqartoq. Taamatulli naatsorsuuteqarnermi ingerlatseqatigiiffiup 2025-mi timmisartuussinissamik pilersaarutaanik tunngaveqarpoq, tamatumani ingerlatseqatigiiffik Nuummit nunanut tamalaanut sapaatip akunneranut tallimariarluni-arfineq marloriarluni timmisartuussisassalluni. Air Greenland tusarniaanermi akissummini paasissutissiivoq nalunaaquttat ingerlaqatigiiffiannut UTC-3-mut uteqqinnerup nassatarissagaa timmisartuuttinissamik pilersaarut taanna ingerlanneqarsinnaanavianngitsoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

3.4. Air Greenlandimut iluaqutit taakku nalunnaquttat siusinnerusukkut ingerlaqatigiiffiannut uteqqinnermi annaaratarneqarsinnaapput, soorluttaaq nalunaaquttat ingerlaqatigiiffiannik atuutitsilernerup kingorna taama pilertortigisumik allanngueqqittoqassappat tamanna nunani tamalaani eqqumiiginartinneqassanganinneqartoq. Aasaanerani nalunaaquttap atorunnaarsinneqarneratigut Kalaallit Nunaata, Danmarkip Europallu akornanni nalunaaquttap ingerlaqatigiiffiata sivikillisinneratigut iluaqutissat pissarsiarineqartut sulì annikilleriartinneqassapput.

Kalaallit Nunaanni nalunaaquttat ingerlaqatigiiffiata Kalaallit Nunaata inissisimaffianut immiini nammineq pissusissamisoortumik nalunaaquttat ingerlaqatigiiffianni UTC-3-miinnera immaqa tunngavigisinnaavaa, piffissalli (aammaarluni) kinguartinnissaa pillugu aalajangiinissaq peqqissaartumik isumaliutigineqartariaqarpoq, tamatumani ulluunerani qaamaneranut pitsaannerusumik naleqqussarnerup nammineernerulernissallu pitsaaqutissaasa aammalu Danmarkimi Europamilu piffissap nikinganerata annertunerulernerata ajoqutissartai oqimaaqatigiissaarneqassallutik, taakku inuussutissarsiortunut, timmisartumik angallannermut takornariartitsinermullu pitsaanngitsumik sunniuteqarsinnaammata, pingaartumik mittarfinnut annertoorujussuarmik aningaasaliinerit siunnersuummut akerliusut eqqarsaatigalugit.

Iluaqutissat ajoqutissanut oqimaaqatigiissaarneqarnissaat siunnersuuteqartup isumaqatigaa.

Eqqarsaatiginiagassat siunnersuummut isumaqataasut eqqarsaatiginiagassallu siunnersuummut akerliusut inatsisissatut siunnersuummut matumunnga nassuiaatini nassuiarniarneqarput – soorluttaaq kingunerisassat pitsaasut pitsaanngitsullu siunnersuutip kingunerisassaattut naatsorsuutigisat allaaserineqarneranni ilanngunneqartut.

Siunnersuuteqartoq taamaalilluni iluaqutissanik ajoqutissanillu oqimaaqatigiissaarinissamut periarfissiisumik Inatsisartut aalajangiinissaanni tunngavissioarniarsimavoq.

4. Ineqarnermut Attaveqaasersuutinullu Naalakkersuisoqarfik

4.1. Ineqarnermut Attaveqaasersuutinullu Naalakkersuisoqarfiup kaammattuutigaa nunat pingaarnertut suleqatigisagut, tassunga ilanngullugu Danmarki aasaanerani nalunaaquttamik atuiinnartillugit nalunaaquttat ingerlaqatigiiffiata UTC-2-miinnera attatiinnarneqassasoq.

4.2. Naalakkersuisoqarfik paasissutissiivoq nalunaaquttat ingerlaqatigiiffiannut UTC-2-mut allannguinnissaq sioqqullugu Air Greenland oqaloqatigisimallugu, tassanngaanniillu oqaatigineqartoq/argumenterede nalunaaquttat ingerlaqatigiiffiat allanngortinneqarpat tamanna suliffeqarfimmut aningaasaqarnikkut annertuumik pitsaaquteqassasoq. Tamatumunnga tunngavigineqarpoq timmisartuussinermut suliaasaqarfimmi nunani tamalaani malittarisassat nassatarisaannik timmisartuussinerit nalunaaquttat ingerlaqatigiiffii sisamat taakkuluunniit sinnerlugit malillugit ingerlanneqartut nalunaaquttat ingerlaqatigiiffiit sisamat ataallugit timmisartuussinerni aningaasartuuteqarfiunerat. Nalunaaquttat ingerlaqatigiiffii arlallit malillugit timmisartuussinernut atatillugu aningaasartuutit annertuumik kinguaattooruteqarni amerleriaateqartarput. Nalunaaquttat ingerlaqatigiiffiannit UTC-3-mit UTC-2-mut nuunnerup kinguneraa nalunaaquttat ingerlaqatigiiffiisa assigiinnginnerat nalunaaquttap akunnerinit sisamanit pingasunut sivikillimmat aammalu tamanna pissutigalugu Air Greenlandip kinguaattooruteqarnernut atatillugu aningaasartuutai annikillimmata.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.3. Nalunaaquttap aalajangersarneqarnera pillugu Inatsisartut inatsisissaattut siunnersuutip tusarniaassutigineqarneranut atataillugu Air Greenlandip tusarniaanermi akissutaa naalakkersuisoqarfimmit innersuussutigineqarpoq. Tassani allassimavoq imarpik qulaallugu timmisartooq pisuni silarlunnera pissutigalugu nunatsinni timmisartuussinermi timmisartunik tikittussanik utaqqisariaqartarnera eqqarsaatigalugu Kalaallit Nunaata Danmarkillu akornanni piffissap nalunaaquttap akunnerinik sisamanik nikinganerata nassatarissavaa inuttat Københavniliannnginnerminni Kangerlussuarmi sivikinnerpaamik nalunaaquttap akunnerini 14-ini qasuersaartassammata, tamatumalu kingorna Københavnimi sivikinnerpaamik ununni pingasuni qasuersaartarlutik. Kalaallit Nunaata Danmarkillu akornanni nalunaaquttap akunnernik pingasunik nikinganerata nassatarissavaa inuttat Kangerlussuarmi taamaallaat

nalunaaquttap akunnerini 10-ni Københavnimilu unnummi ataatsimi qasuersaartassammata. Tamanna ilaasunut ingerlatseqatigiiffimullu iluaqutaassaaq.

Tusarniaanermi akissutit siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarput.

4.4. Taamaalilluni nalunaaquttat ingerlaqatigiiffiannut UTC-3-mut allannguneq Air Greenlandip eqaannginnerusumik ingerlatsilerneranik nassataqassaaq, soorluttaaq aningaasartuutit amerlinerat akinik aqqissuinnermi malugineqarsinnaassasoq. Tamanna Air Greenlandip sullitaanit malugineqarsinnaassaaq. Tamatuma kingunerisanik takornariartitsinermik ingerlataqartunut kinguneqarnissaa naatsorsuutigineqartariaqarpoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.5. Nalunaaquttat ingerlaqatigiiffiata UTC-2-p atorneratigut Europap annersaanut aammalu USA-mut Canadallu kangimut sineriaanut nalunaaquttap akunnerinik pingasunik nikingassuteqassaaq. Taamaalilluni takornariartitsinermik ingerlatsisunut iluaqutaasumik Amerikap avannaanut timmisartuussinernik pilersitsinissaminut inuttat assingisa atornissaannut Air Greenlandip periarfissai pitsanngoriaateqassapput.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.6. Air Greenlandip ingerlatani nalunaaquttat ingerlaqatigiiffiat UTC-2 malillugu naleqqussarsimavai aammalu nalunaaquttat ingerlaqatigiiffiannik UTC-3-mik atuileqqittoqaraluarpat tamanna annertoorujussuarmik aningaasartuuteqarnermik nassataqassasoq naatsorsuutigineqarluni. Taamaattumik siunnersuummut nassuiaatini ima allassimasoqarnera paatsuunganartutut naalakkersuisoqarfiup isigaa: ”Kingunerisassalli [inuussutissarsiortunut] pitsaanngitsut annertunaviannngitsut naatsorsuutigineqarpoq”.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.7. Tamatuma saniatigut nalunaaquttat ingerlaqatigiiffiata UTC-2-mut allanngortinneqarnerata kingunerissavaa Danmarkimi suleqatigisat onlinemik ataatsimeeqatiginissaannut piffissaq atorneqarsinnaasoq sivikillissammat. Tamanna pingaartumik Danmarkimi taamaallaat ullaakkut ullup qeqqataluunniit siorna taamaallaat attavigisinnaasanut atuuppoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.8. Siunnersuummut nassuiaatini oqaatigineqarpoq siunnersuut innuttaasut peqqissusiannut pitsaasumik kinguneqarsinnaasoq. Naalakkersuisup tassunga atatillugu oqaatigaa Islandimi peqqissutsimut ministereqarfiup ataani suleqatigiissitamit kaammattuutit siunnersuummut nassuiaammi innersuussutigineqartut. Misissuinerit Europami USA-milu ingerlanneqarsimasorinartut suleqatigiissitamit innersuussutigineqarput. Kalaallit Nunaanni ullut sivisussusiisa ukiup ingerlanerani nunallu immikkoortuisa ilaanni assigiinngitsuni assigiinngitsorujussuunerata annertuumik pingaaruteqarneranik isummertoqarnissaa naalakkersuisoqarfimmit amigaatigineqarpoq. Taamaalilluni, pingaartumik ullup sivisussusiata pissusissamisoortumik assigiinngissuseqarneranut akerliusunik nalunaaquttat ingerlaqatigiiffiat pissutigalugu, innuttaasunit qanoq amerlatigisut ajornartorsiutinik taaneqartunik misigisaqassanersut ersernerluppoq.

Ajornartorsiutip tamatuma attuumassuteqartuunera siunnersuuteqartup misirratiginngilaa, apeqqummullu immikkut nassuiaataasunik misissuisoqarsimanersaq ilisimanagu.

4.9. Naalakkersuisoqarfiup oqaatigaa siunnersuummut nassuiaatini innersuussutigineqarmat, ”nalunaaquttat ingerlaqatigiiffiata allanngortinneqarnera arlallit meeqqaminnut sunniuteqarsimasooq misigisarsimagaat, tassa meeqqat unnukkut sininniarminnik ullaakkullu makinniarminnik atuariatornissaminnullu ajornartorsiuteqartarsimammata. Taamatutaaq atuarneqarsinnaasimavoq Kalaallit Nunaata Avannaani aalisartorpassuit piniartorpassuillu piniariarnissaminnut seqerngup nuinissaa utaqqikatattarsimagaat”. Naalakkersuisoqarfimmit eqqumiigineqarpoq timersortartut nalunaaquttap ingerlaqatigiiffiannut UTC-2-mut nuunneqarneranik tigusilluarnerannik tusagassiorfiit allaaserinninnerat nassuiaatini tamatuma peqatigisaanik innersuussutigineqanngimmat, tassa allannguneq ilaatigut silami sammisaqarfiusinnaasumik ualinerani sivisunerusumik qaamasarneranik nassataqarmat, soorluttaaq ualinerani qaammaarinnera ilaqutariittut inuunissaminnut periarfissagissaarnerulernertik ilaasa naammagisimaaraat.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.10. Aasaanerani nalunaaquttap ataavartumik atorunnaarsinneqarnissaanut oqaaseqaatit: Nunanik aasaanerani nalunaaquttamik atuisunik suleqateqarnerup angallannikkullu attaveqateqarnerup oqilisarneqarnissaat Kalaallit Nunaanni aasaanerani nalunaaqutaqarnerup siunertaraa.

Danmarki Europallu sinnera, Canadap annersaa (tassungalu ilanngullugu Nunavut) aasaanerani nalunaaqutaqarput, Islandilu aasaanerani nalunaaquttamik atuiunnaarsimalluni.

Oqaatigineqassarli nunat siuliani taaneqartut ullut aasaanerani nalunaaquttamut ikaarsaariartarfii assigiinngillat.

Maannakkut Danmarkimut piffissap ukioq tamaat assigiinngissutaa nalunaaquttap akunneri pingasuupput. Siunnersuut akuerineqassappat aammalu Kalaallit Nunaat nalunaaquttat ingerlaqatigiiffiannut UTC-3-mut utissappat kiisalu aasaanerani nalunaaquttamik atorunnaarsitsissappat Danmarkimut piffissap assigiinngissutaa ukiukkut nalunaaquttat akunneri sisamaassapput aasakkullu nalunaaquttap akunneri tallimaassallutik. Nalunaaquttap ingerlaqatigiiffiat nikisinnagu aasaanerani nalunaaqutaq atorunnaarsinneqassappat Danmarkimut piffissap assigiinngissutaa ukiukkut nalunaaquttap akunneri pingasuussapput aasakkullu nalunaaquttap akunneri sisamaassallutik. Aasaanerani nalunaaquttap atorunnaarsinneqarnissaa kisiat toqqarneqarpat tamanna Air Greenlandimut aningaasaqarnikkut kinguneqassaaq, timmisartumik angallassinermut suliaasaqarfimmi nunat tamalaat malittarisassaataaneqartut pissutigalugit.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

4.11. Ulloq aallarnerfiusussaq pillugu oqaaseqaat: Naalakkersuisoqarfiup oqaatigaa ulloq aallarnerfiusussaq ulloq 27. oktober 2024-mut inissinneqarsimasoq. Tamanna isumaqarpoq Inatsisartut inatsisaat akuerineqarnerminit ullualunnguit sivilisunerpaamilluunniit sapaatip akunnerisa qaangiunneranni atuutilersinneqassasoq.

Tamatuma nassatarissavaa inuussutissarsiortut allannguummut naleqqussarnissaminnut piffissaqassanngimmata. Tamanna pingaartumik inuussutissarsiortunut nalunaaquttap ingerlaqatigiiffii akimorlugit pilersarusiortartunut, tassungalu ilanngullugu Air Greenlandimut Kalaallit Nunaanni nunanilu allani miffarfiit peqatigalugit piffissamut pilersaarutiniq ataqatigiissaarisumut ajornartorsiortitsissaaq. Siunnersuut akuerineqassappat suliffeqarfiup aningaasaqarneranut sunniuteqartumik tunngaviusumik atugassarititaasut ilaat ataaseq piffissap sivikilluinnartup iluani Air Greenlandip allanngortissavaa.

Tamatuma saniatigut nalunaaquttat ingerlaqatigiiffiata nikisinneqarnerata nunani tamalaani oqartussanut nalunaaquttat ingerlaqatigiiffii pillugit takussutissianik ingerlataqartunut nalunaarutigineqarnissaa ingerlatsinneqarnissaalu piffissamik atuiffiusaaq.

Taamaattumik nalunaaquttat ingerlaqatigiiffiannik taama sivikitsigisumik piffissaqartitsilluni allanngortitsisoqaqqunagu naalakkersuisoqarfik sakkortuumik nangartaavoq. Nalunaaquttat ingerlaqatigiiffiannut UTC-2-mut nikinnermit misilittakkat tunngavigalugit akuersissuteqarnermit atuutilersitsinissap tungaanut sivikinnerpaamik ukiup ataatsip atornerqarnissaa naalakkersuisoqarfiup kaammattuutigaa.

Air Greenland tusarniaarnermi akissummini paasissutissiissutigaa, 2025-mut timmisartuussinissamik pilersaarummik aalajangersaasoqareersoq, tamanna tunngavigalugu inissaqassuseq pillugu millioninik marlunnik kisitsitalimmik pituttuisuusumik isumaqatigiissusiortoqarsimasoq aammalu bilitsit tuniniarneqalereersut. Timmisartuussinissamilli pilersaarut tamanna malillugu piffissap nalunaaquttat ingerlaqatigiiffiannut UTC-3-mut allanngortinneqarneratigut timmisaartuussinissaq ajornarpoq.

Taamattumik nalunaaquttat ingerlaqatigiiffiata UTC-3-mut allanngortinneqarnerata nassatarissavaa millioninik marlunnik kisitsitalimmik inissaqassuseq atorluarneqarsinnaassanngimmat aammalu bilitsit tunineqartut tamaasa Air Greenlandimit taamaatiinnarneqartariaqassammata utertinneqartariaqarlutillu, tamannalu nalunaaquttat ingerlaqatigiiffiat allanngortinneqassappat tamatuma qaqugu atuutilernissaa apeqqutaatillugu millioninik marlunnik pingasunilluunniit kisitsitalinnik akeqassaaq.

Tamanna tunngavigalugu siunnersuutip ulloq atuutilerfissaata allanngortinneqarnissaanik isumaliutigineqartut naleqquttuusorinarput. Siunnertuutilli ataatsimiititaliamit suliarineqarnissaata utaqqimaarneqarnissaa naapertuunnerpaatut siunnersuuteqartumit isigineqarpoq.

4.13. Naliliisoqarnissaanik kaammattuuteqartoqarnera: Nalunaaquttat ingerlaqatigiiffiat UTC-3-mut utertinneqarluni allanngortinneqarnissaanut isumaqataasoqarlunilu akerliusoqartoq naalakkersuisoqarfiup maluginiarpaa. Taamaattumik nalunaaquttat ingerlaqatigiiffiannik atuuttumik naliliisoqartinnagu nalunaaquttat ingerlaqatigiiffiannik allannguinnissaq pillugu aalajangiisoqannginnissaa naalakkersuisoqarfiup kaammattuutigaa. Innuttaasut naammagisimaarinnittut naammaginninngitsullu tusarniarneqarnissaat naliliinermi taamaattumit periarfissinneqartariaqarpoq. Naliliineq piffissami innuttaasut nalunaaquttat ingerlaqatigiiffiannik nutaamik sungiussisimaneranni ingerlanneqartariaqarpoq, taamaalilluni nalunaaquttat ingerlaqatigiiffiannik nutaamik sungiussineq pinnagu nalunaaquttat ingerlaarfiat UTC-2 naliliiffik naliliiffigalugu. Aammattaaq nalunaaquttat ingerlaqatigiiffiat aasaanerani nalunaaquttap atornerarnera immikkoortillugit naliliiffigineqartariaqarput.

Aningaasaqarnermut Akileraartarnermullu Naalakkersuisoqarfiup tusarniaarnermi akissutaanut siunnersuuteqartup oqaaseqaatai innersuussutigineqarput, immikkootoq 1.5.

5. Peqqissutsimut Naalakkersuisoqarfik

5.1. Inuiaqatigiit nalunaaquttat ingerlaqatigiiffiannut allamut ikaarsariarnermi aamma/imaluunniit aasaanerani nalunaaquttap atorunnaarnerani innuttaasunut ataavartumik/sivisunerusumik sunniutitut uppersaatinik peqanngitsoq Peqqissutsimut Naalakkersuisoqarfiup oqaatigaa.

Aasaanerani nalunaaquttamut aamma/imaluunniit ukiuunerani nalunaaquttamut ikaarsaariarnerit ulloq unnuarlu ingerlaasigut piffissami sivikinnerusumi nikingassuteqalersissinnaavai assersuutigalugu sinnakinneruneq pissutigalugu, sinittarnerulli annikitsuararsuarmik nikisinneqarnera peqqinnangitsuuneranut ulorianartuuneranulluunniit ilisimatusarnikkut sunngumilluunniit uppersaatissartaqanngilaq.

Peqqissutsimut aarleqqutaasinnaasut aasaanerani nalunaaquttamut ukiuuneranilu nalunaaquttamut ikaarsaariarnernik pissuteqarsinnaasut ilisimatusarnikkut misissuinernit paasinarsisinneqartut sivikitsuinnarmik atuuttarnerat ilumoorpoq, soorlu tamanna inatsisissatut siunnersuummut matumunnga nassuiaatini aamma allassimasoq

Tamanna nalunaaquttat ingerlaqatigiiffiannut allamut ikaarsaariarnerup kingunerisaanik piffissap allanngornera eqqarsaatigalugu aamma naaatsorsuutigineqartariaqarpoq.

Akerlianik peqqissutsimut aarleqqutaasinnaasut ilisimatusarnikkut misissuinernit paasinarsisinneqartut nalunaaquttat ingerlaqatigiiffianni piffissamit seqinnerfiusartumit allaanerusemik nalunaaquttat ingerlaqatigiiffianni inuunermut attuumassuteqartutut ilisimatusarnikkut misissuinernit paasinarsisinneqartut sivikitsuinnarmik atuussorinangillat.

Ilisimatusartut atuagassiaat uani saqqummersinneqartoq Journal of Health Economics vol. 65, 2019 (Giuntella og Mazzonna) assersuutitut innersuussutigineqarsinnaavoq.

Islandimi peqqissutsimut ministeriaqarfiup ataani suleqatigiissitap taamaalilluni 2018-imi inerniliuppa Islandimi nalunaaquttat ingerlaqatigiiffiata piffissallu seqinnerfiusartut assigiinnginnerisa napparsimalersinnaaneq annertusisittaraa, meeqqat atuartut ilikkagaqarsinnaanerap ajornerulersittaraa, taamatullu aamma minnerunngitsumik meeqqat inuusuttullu akornanni nanertisimanermik qasunermillu eqqorneqarsinnaaneq annertunerulersittarlugu.

Siunnersuuteqartup tassunga atatillugu oqaatigaa FN-ip meeqqat pisinnaatitaaffii pillugit isumaqatigiissutaa naapertorlugu meeqqat peqqissutsikkut sapinngisamik annertunerpaamik anguneqarsinnaasumik inissisimanissaat qulakkiissallugu (tak. isumaqatigiissutmi artikel 24) Kalaallit Nunaata pisussaaaffigigaa.

5.2. Ualikkut/unnukkut qaamarngup innuttaasut silami sammisaqartarneranni nalunaaquttap akunneri atortagaat amerlisisinnaagai ilisimatusarnerup takutippaa.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

6. Kommune Kujalleq

Kommune Kujalliup paasissutissiissutigaa inatsisissatut siunnersuut kommunalbestyrelsimi ilaasortanut nassiunneqarsimasoq.

Ilaasortanit 15-iusunit tallimat tusarniaanermi akissuteqarput.

Ilaasortat sisamat akissuteqarput inatsisissatut siunnersuutip imarisaanut tamarmut isumaqataallutik.

Ilaasortaq ataaseq akissuteqarpoq siunnersuut tapersersorsinnaanagu. Tunngavilersuutigisaa tassaavoq nalunaaqutaq maannakkutut inissisimatillugu inooriaatsimut tulluurtuusoq. Aasaanerani seqineq nalunaaqutaq tallimanut-arfinernut nuisarpoq, unnuakkut nal. 4 pinnani. Upernaakkut soraarnerup kingorna sulii qaamatillugu pinngortitamukarnissamut periarfissaqarpoq. Ukiukkut soraarnerup kingorna qaamanerup maluginissaa angumerineqarsinnaavoq. Siusinnerusukkut suliaartornermi sulereernermilu sila taartarpoq. Maanna sulereerluni soraarnermi qaamasarpoq.

7. Kommuneqarfik Sermersuumi Sanarfinermut Avatangiisinullu Ingerlatsivik

7.1. Kommuneqarfik Sermersuumi Sanarfinermut Avatangiisinullu Ingerlatsivik paasissutissiivoq nalunaaquttat ingerlaqatigiiffiannut UTC-2-mut allannguneq suleqatigisat Kalaallit Nunaata avataaniittut eqqarsaatigalugit annertuumik pitsanngoriaatitut ingerlatsivimmit misigineqartoq. Pingaartumik piffisap suliffiup nalinginnaasup iluani Europap ataatsimeeqatigisinnaanera maanna malunnaatilimmik ajornannginnerulerpoq, siusinnerusukkut taamaannani, tamatumani ataatsimiinnissamut angumersiniarluni unnuakkut makittoqartariaqarsinnaasarluni.

Paasissutissat pisortanut aningaasaqarnikkut allaffissornikkullu kingunerisassat pillugit nalinginnaasumik nassuiaaatini immikkoortoq 3-mi ilanngunneqarpoq.

7.2. Ingerlatsivimmit maluginiaqquneqarpoq Kommuneqarfik Sermersuumi nunap immikkoortuata kangisissortaata killeqarfia nalunaaquttat UTC-1-ip aammalu UTC-2-p akornanniimmat. Taamaattumik nalunaaquttap aalajangersarneqarnera allanngortinneqassagaluarpat Kalaallit Nunaata kangisissortaani nalunaaquttap UTC-2-p maliinnarneqarnissaa ingerlatsivimmit kaammattuutigineqarpoq.

Sumiiffiit erseqqinnerusumik taaneqartut nalunaaqutaq UTC-3 pinnagu nalunaaquttat ingerlaqatigiiffiannik allamik atuinissat pillugu malittarisassanik Naalakkersuisut aalajangersaasinnaanernut piginnaatitsissummik siunnersuut imaqarpoq (Inatsisartut inatsisaanni § 1, imm. 2). Kissaatigineqassappat Tasiilamut Ittoqqortoormiunullu nalunaaquttap ingerlaqatigiiffii immikkut ittut inatsisitigut tunngavissaq ilaatigut atorineqarsinnaassaaq.

8. Kommuneqarfik Sermersuumi Isumaginninnermut Suliffeqarnermullu Ingerlatsivik

Isumaginninnermut Suliffeqarnermullu Ingerlatsiviup oqaatigaa nalunaaqutaq utertinneqassappat tamanna Europami nunanik, tassungalu ilanngullugu pingaartumik Danmarkimik, pisariaqartumik suleqateqarnermut sunniuteqarsinnaasoq. Tamatumunga pissutaavoq Danmarkimi oqartussanik piffissani ammasarfiini attaveqarnissamut piffissat annikilleriarnissaat.

Ingerlatsiviup aamma oqaatigaa timmisartukkut angallassinermi ulluinnarlugu angallassinissamut periarfissat siunnersuummit annikillisinneqarsinnaasut, taamaalillunilu piffissamut angalanermut atorneqartumut akunninnernullu tunngatillugu aningaasartuutit annertusinerannik nassaqarsinnaalluni.

Kiisalu ingerlatsiviup oqaatigaa aasaanerani nalunaaqutaq atorunnaarsinneqassappat tamanna Europamut piffissat assigiinngissutaata ukiumut marloriarlugu allanngortinneqartarnera eqqarsaatigalugu annikinnerusumik unammilligassaqartitsisinnaasoq, tamatuma peqatigisaanik Europami nunat allat nunarsuullu sinnerani nunat aasaanerani nalunaaquttamik atorunnaarsitsinngippata.

Paasissutissat pisortanut aningaasaqarnikkut allaffissornikkullu kingunerisassat pillugit nalinginnaasumik nassuiaaatini immikkoortoq 3-mi ilanngunneqarpoq.

9. Air Greenland

9.1. Air Greenlandip kaammattuutigaa Kalaallit Nunaanni nalunaaquttat ingerlaqatigiiffiat maanna atuuttoq allanngortissanngikkaa. Nalunaaquttat ingerlaqatigiiffiat allanngortinneqarpat tamanna Air Greenladimut aningaasaqarnikkut inuussutissarsiornikkut kinguneqassaaq, taamaalillunilu aamma timmisartuussinissamik pilersaarummut pingaartumik nunanut allanut timmisartuussisarnikkut unammilleqatigiinnermi Air Greenlandimut nukittorsaataasussamut kinguneqassalluni.

9.2. Air Greenland paasissutissiivoq nalunaaquttat ingerlaqatigiiffiannut UTC-2-mut allannguneq Air Greenlandimut aammalu Kalaallit Nunaannut Kalaallit Nunaannillu angalasunut pitsaalluinnartumik sunniuteqarsimasoq aammalu periarfissanut nutaarluinnarnut aammaassisimasoq.

Nalunaaquttat ingerlaqatigiiffiata allanngortinneqarnerani Kalaallit Nunaata nalunaaqutaq Europami nalunaaqutaanit nalunaaquttap akunnerinik pingasunik nikingalerpoq, tamannalu timmisartumi inuttat piffissamut qasuersarfissaattut atuuttumut atatillugu piumasaqaatinut pingaaruteqarpoq. Tamatuma nassataaa timmisartut inuttallu Kalaallit Nunaanni unnuisinnaammata aqaguanilu aallaqqillutik, soorluttaaq tamanna inuttanik Kalaallit Nunaanneersunik atuinissamut, taamaalillunilu najukkami sulisussat sunissami amerleriartinneqarnissaannut periarfissaqalersitsisoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

9.3. Air Greenland nangilluni paasissutissiivoq ingerlatseqatigiiffik nalunaaquttat nerlaaqatigiiffiat UTC-2 maanna atuuttoq tunngavigalugu 2025-mi timmisartuussinissamik pilersaarummik nutaamik saqqummiussisimalluni, tamatumani martsimit oktoberip nalaanut sapaaatip akunneranut sisamariarluni Nuummit ullaakkut aallartoqarsinnaalluni ualikkullu Europamut tikittoqarluni, kingornagullu unnukkut timmisartorluni Kalaallit Nunaannut timmisartup inuttallu unnuiffigisassaannut angerlartoqarluni. Taamaaliornikkut Kalaallit Nunaannit Europamut tamarmut aallarfiissat ulluinnarlugu angumerineqarsinnaapput, soorluttaaq Europamut tamarmut ulluinnarlugu Kalaallit Nunaannukartoqarsinnaasoq. Siusinnerusukkut Københavnimi unnuqqaarmissaq pisariaqarsimavoq.

Timmisartuussinissamik pilersaarut taanna ullaakkut unnukkullu aallarfiusartup Kalaallut Nunaat allatorluinnaq aammaassiffigaa tikikkuminarsaataangaatsiarlunilu, taamaattumik siuariartortoqarnissaa naatsorsuutigineqarpoq aammalu takornariaqarnikkut, inuussutissarsiornikkut pisortatigullu periarfissanik nutaanik pilersitsissalluni.

Air Greenlandimit maluginiaqquneqarpoq 2025-mut timmisartuussinissamik pilersaarut saqqummiunneqareersoq billetsinillu tuniniaaneq aallartereernikuusoq. Timmisartuussinissamik pilersaarutit ukiup ataatsip missaanik siunissamut sioqqutsilluni saqqummiutereerneqartarneri timmisartuussisarnermi ileqquuvoq. Taamaattumik nalunaaquttap ingiaqatigiiffiata UTC-3-mut utertillugu allanngorteqqinnissaa Air Greenlandimut aningaasatigut kinguneqartussaavoq aammalu Kalaallit Nunaannit ullaakkut Europamiillu ualikkut aallartoqartarnerata ingerlatiinnarnissai periarfissaajunnaassallutik. Ilutigisaanillu Air Greenlandip inuttaminik Kalaallit Nunaanni najugaqarfeqartitsisinnaanera periarfissaajunnaassalluni, naak timmisartorsuaq Europami uninngasaraluartoq tassanilu tekniikitigut aserfallatsaaliorneqartartoq.

Tamanna tunngaviglaugu siunnersuutip ulloq atuutilerfissaata allanngortinneqarnissaanik isumalitigineqartut naluttuusorinarput. Siunnersuutilli ataatsimiititaliamit suliarineqarnissaata utaaqimaarneqarnissaa naapertuunnerpaasoq siunnersuuteqartoq isumaqarpoq.

9.5. Nalunaaquttap ingiaqatigiiffianik allannguinermi Air Greenlandimut siunissami qaninnerusumi aningaasatigut kingunerisassai annertooujussuussapput.

2025-mut timmisartuussinissamik pilersaarummik saqqummiussisoqareerpoq, tamannalu tunngavigalugu timmisartuussinissat qanoq amerlatigissanersut pillugu pituttorsimasunik isumaqatigiissusioreerpoq billetsinillu tuniniaasoqalereerluni. Timmisartuussinissamik pilersaarut taanna nalunaaqutaq UTC-3-mut allanngortinneqassappat periarfissaajunnaassaaq.

Taamaattumik nalunaaquttap ingerlaqatigiiffiannut UTC-3-mut allanngortinneqarnera Air Greenland naapertorlugu imatut kinguneqassaaq aningaasaatit millionilikkaat atorluarneqarsinnaajunnaassallutik, aammalu Air Greenlandip billetsit tuneriikkat tamarmik taamaatiinnartariaqalissallugit pisisumullu aningaasat utertittariaqalissallugit, tamannalu aamma millionilikkaanut arlalinnik kisitsisitalinnik naleqartussaassalluni, tassani apeqqutaalluni nalunaaquttap ingerlaqatigiiffiannik allannguisoqassappat ulloq atuutilerfissaa.

Siunnersuuteqartup oqaaseqaatai qulaani allassimasut innersuussutigineqarput, immikkoortoq 9.4.

9.6. Siunissaq ungasinnerusooq eqqarsaatigalugu aningaasatigut kingunerisinnaasai tassaapput siuariartornerup annikinnerunissaanik naatsorsuuteqarneq aammalu timmisartut inuttallu atorneqarsinnaanerinit periarfissat annikillineri ilutigalugit aningaasartuutissat annertunerulissapput taamaalillunilu timmisartuussinissaq killeqarnerulerluni.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

10. GrønlandsBANKEN

10.1. Nalunaaquttat ingiaqatigiiffianink toqqaanissamut atatillugu aningaaserivik tunngaviusumik eqaatsumik inissisimasooq GrønlandsBANKENimit oqaatigineqarpoq.

10.2. Taamaakkaluartoq immikkut ittumik pisoqarsimanngippat allannguinnissamik pisariaqalersitsisumik inatsisip akuerineqareersup allanngorteqqinnissaanut GrønlandsBANKEN isumaqataannngilaq.

Nalunaaquttat ingerlaqatigiiffiannik allanngortitsinissaq eqqarsaatigalugu nalunaaquttat ingerlaqatigiiffiata massakkut atuuttup (UTC-2) ajoqutissartai siunnersuummi allatorneqarsimasut uani nalunaaquttat ingerlatigiiffiata atuutilersinneqarnissaanut Inatsisartut akuersimmata ilisimasaqarfigineqanngissimanissaat aningaaserivimmit ilimagineqanngilaq. Taamaattorli aningaaserivimmit naqissuserneqarpoq nalunaaquttat ingerlaqatigiiffiata UTC-2-mut allanngorneqarnissaanut inatsisissatut siunnersuutip atuarneqarsimanera pillugu tusarniaanermut akissummik tunniussinermut attuumassuteqanngitsoq.

Inatsisitigut patajaatsuunissaq eqqarsaatigineqartariaqartoq siunnersuuteqartumit ilisimaneqarpoq. Tamanna inatsimmut atuutsinneqalersimasumi akornutinut paasineqarnikuusunut sanillersuunneqarsinnaavoq.

10.3. Tamatuma saniatigut nalunaaquttat ingerlatigiiffianni UTC-2-mi aamma pitsaaqutaasut inatsisissatut siunnersuummut iluaqutaasumik ersersinneqarsinnaapput:

Kalaallit Nunaanni aningaasanik nuussisarnerit annerpaartaat Europamut nuunneqartartut GrønlandsBANKEN-imit paasissutissiisutigineqarpoq, nalunaaquttallu ingiaqatigiiffianik allannguissamut siunnersuutaasup Europami aningaaseriviit matunnginnerini nunatsinni aningaaseriviit taamatut aningaasanut nuussisarnissaat akunnermik ataatsimik sivikinnerulersissagaa. Tamanna aamma Europami aningaasaateqarfiit niueqatigiittarfianni pappiliat nalillit atorlugit niueqatigiittarnermut atuuppoq.

Tamatuma saniatigut GrønlandsBANKEN suleqatigisartakkani Europamiut aqqutigalugit ikiorneqarnissamut neqeroorutinik arlalinnik peqarpoq. Inatsisissatut siunnersuut akuerineqassappat taamatut ikiorneqarnissamut periarfissaq akunnermik ataatsimik sivikinnerulissaaq.

Ilutigisaanillu suleqatigisartakkat europamiusut peqatigalugit ataatsimiinnissat pikkorissaanissallu pilersaarusiornissaannut atatillugu nalunaaquttat ingerlatigiiffiat UTC -2 eqaannerusumik inissisimavoq. Amerlanertigut Europami qarasaasiatigut ilinniartitsineq nalunaaqutaq 09.00 aallartittarpoq. Nalunaaquttap nikinganera sivitsussappat tamanna kalaallinit peqataasoqarnissaanut piffissatigut periarfissakitsitsinerulernissaanik kinguneqartussaavoq.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

10.4. UTC-3-mit UTC-2-mut nikittoqarnerani aningaasartuutaasut nassuiarneqarneranik inatsisissatut siunnersuutip oqaaseqaataani ilanngullugu suliaqartoqarnissaa GrønlandsBANKEN-imit kaammattuutigineqarpoq, tassunga ilanngullugit assersuutigalugu pilersaarusiortarnernut allanullu aningaasartuutit, tassami UTC-3-mut uteqqittoqassappat aningaasartuutaasimasut assinginik pisortat namminersortullu suliffeqarfiutaat akiligassaneqqissammata.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq. Taamaakkaluartoq nalunaaquttap aalajangersarneqarnera pillugu Inatsisartut inatsisaannut atuuttumut nassuiaatit tunngavigalugit imaluunniit inatsisissatut siunnersuummut matumunnga tusarniaanermi akissutit tunngavigalugit aningaasartuutit pineqartut erseqqinnerusumik annertussusissaat missingerneqarsinnaasimanngilaq.

10.5. Misissuinerit arlallit aasaanerani nalunaaquttap akornutaanerani takutitsisut tunngavigalugit aasaanerani nalunaaquttap allanngorneqartarnerata atorunnaarsinneqarnissaanut siunnersuuteqartoqarsimasoq GrønlandsBANKEN-imit maluginiarneqarpoq. Misissuinerinik taakkua akerlianik takutitsisunik peqarneris pillugu aamma qulaajaasoqarnissaa aningaaserivimmit siunnersuutigineqarpoq. Isiginnittariaaseq

ataasiinnaq aallaavigalugu misissuinerit kisiisa toqqammavigalugit aalajangiisoqannginnissaa qulakkeerniarlugu taamatut kaammattuuteqartoqarpoq.

Oqaaseqaatini nalinginnaasuni immikkoortoq 5-imi (avatangiisinut, pinngortitamut inuillu peqqissusaannut kingunerisassai) aasaanerani nalunaaquttap allanngortarnerata atorunnaarsinnissaanut siunnersuutip kingunerisassai annikitsuinnarmilluunniit pitsaasuusinnaaneriniq isumaqalernissamut tunngavissiipput.

Nalunaaquttamik allannguineq peqqissutsimut artorsaateqalersitsisinnaasoq ilisimatusarnikkut misissuinerit arlallit takutikkaat itisiliissutitut paasissutissiissutigineqarpoq, sunniutaasussallu taakkua sinnarlunnermut timip sungiusimasamik ingerlaasaanut allanngortitsisinnaasut.

Ilutigisaanilli maluginiaqquneqarpoq aasaanerani nalunaaquttap aaqqissorneranut atatillugu pitsaanngitsumik kingunerisinnaasaatut misissuinerit tamarmik assigiinngimmata, misissuinerillu ilai assortugassaanatik.

Inatsimmut nassuiaatinut atuuttunut sinaakkutit iluanni siunnersuuteqartoq ima isumaqarpoq, tamassuma iluani ilisimatusarnermit ilisimasat tunniunneqarsimasut allanngornagit oqimaaqatigiissaakkamik tunniussisimalluni.

11. Tusass

11.1. Tusass paasissutissiivoq ingerlatseqatigiiffiup - eqqarsaatigilluareerlugu – nalunaaquttat ingerlaqatigiiffiata UTC-3-mut allanngortinneqarnissaa imaluunniit Kalaallit Nunaanni aasaanerani nalunaaquttap allanngortinneqartarunnaarnissaa tapersersunngikkai.

11.2. Tusassimit oqaatigineqarpoq nalunaaquttat ingerlaqatigiiffiat UTC-3-mut allanngortinneqassappat Danmark nunallu skandinaviamiittut europamiittullu allat nalunaaqutaasa nikinganerat massakkutut akunnerit pingasuujunnaarlutik akunnerit sisamanngoqqissasut. Tusassip nalilerpaa tamanna nunat immikkoortut marluk akornanni suliassanik, ataatsimiinnissanik attaveqatigiinnissanillu aaqqissuussiniarnermut ajornarnerulersitsissasq, taamaattumillu Tusassimut pitsaanngitsunik kinguneqassalluni.

Tassunga atatillugu Tusassimit paasissutissiissutigineqarpoq Tusass´ip suleqatigisartagai amerlasoorpassuit Danmarkimiillutillu Europamiittut, aammalu taakku suleqatigisarnerat ullumikkut pitsaanerulersimasoq Tusass´imit malugineqartoq, tassami suleqatigiinnissamut ulluinnarni akunnermik ataatsimik sivisunerusumik suleqatigiit taakkua periarfissaqalernikuupput. Taanna akunneq ataaseq ilassutaanikuusoq suliffeqarfiup iluani sullarissutsimut ilaatigullu danskit suleqatigisartakkut suleqatiginissaannut pinngitsoorneqarsinnaanngitsumut pitsaanerulersitsilluni qaffassaataasimavoq. Nalunaaquttap nikinganeri sivitsorneqassappata sullarissuseq taanna innarlerneqassaaq unammilligassanillu allanik pilersitseqqissalluni.

Tusarniaanermi akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

11.3. Aasaanerani nalunaaquttap allanngortarnerata atorunnaarsinneqarneratigut Tusass´imut pitsaanngitsunik kinguneqassasoq Tusass´imit nalilerneqarpoq, ingammik Danmark nunallu skandinaviamiusuusut europamiusuusullu peqatigalugit ataqatigiissagaanngippat. Aasaanerani nalunaaquttap allanngortarnera atorunnaartinneqassappat aatsaat tamanna pissasoq Danmarkimi aammalu Skandinaviap sinnerani aamma atorunnaarsitsissappata Tusass´imit inassuteqaatigineqarpoq.

Tassunga atatillugu Kalaallit Nunaanni Danmarkimilu nalunaaquttap malitassai assigiinngitsuussappata piffissamik aqutsiniarnermut ingerlatseqatigiiffiullu suliffeqarfiini pilersarusiorniarnermut ajornarnerulersitsissasoq Tusass´imit oqaatiginiarneqarpoq. Nunat immikkoortut taakku marluk akornanni nalunaaquttat ingerlaqatigiiffiata kiisalu aasaanerani/ukiuunerani nalunaaquttat allanngortarneri assigiinngitsut Tusass´ip nunat tamalaat akornanni suliaqarniarneranut suleqateqarneranullu paatsuunganermik naammassinnissinnaannginnermillu pilersitsisinnaapput. Pisariaqanngitsumik ajornakusuulersitsineq aamma Tusass´ip suliniutinik ulluinnarnilu suliaassanik ataqatigiissaariniarneranut kinguarsaataassaaq.

Tusarniaanermut akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

12. Modulo ApS

12. 1. Nalunaaquttap ingiaqatigiiffia UTC-2 massakkut atuuttoq iluarnerusutut Modulo ApS-imit isigineqarpoq, suliffeqarfiup Europami suleqatigisartagaanut pingaarnerpaanut piffissatigut pitsaanerummat tamannalu attaveqaqatigiinnermik suleqatigiinnermillu pitsaanerulersitsimmat.

12.2. Nalunaaquttap ingiaqatigiiffianik allannguutip atuutilersinneqarnerata atortorissarutit piffissamik aqutsinermik ingerlatsisartut tulluarsartariaqalernissaat eqqarsaatigalugu annertuumik unammillernartoqassasoq Modulo ApS tikkuussivoq.

Tusarniaanermut akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

12.3. IT-mut tunngasunik suliffeqarfik Modulo ApS assingusumik oqaaseqarpoq, aasaanerani nalunaaquttap allanngortinneqartarnera atorunnaarpat tamanna pisariaqanngitsumik paatsuungalersitsisinnaasoq nunallu tamalaat akornanni attaveqaqatigiinniarnermut ajornarnerulersitsisinnaasoq, taamaattoqassappallu tamanna innuttaasunut suliffeqarfinnullu nalunaaquttat ingerlaqatigiiffiini allaneersuni qanimut suleqateqartartunut sunnuteqassasoq.

Aatsaat Danmark/EU aasaanerani nalunaaquttap allanngortinneqartarnera atorunnaarsereerpassuk Kalaallit Nunaanni aasaanerani nalunaaquttap allanngortinneqartarnerata atorunnaarsinneqarnissaa isumaqalissaaq.

Tusarniaanermut akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

12.4. Taamaattumik patajaassuseq qulakkeerniarlugu Modulo ApS kaammattuuteqarpoq nalunaaquttat ingerlaqatigiiffiat massakkut atuuttoq aasaaneranilu nalunaaquttap nikittarnera taamaaginnassasoq taamaaliornikkullu suleqatigut europamiusut angusaqarfiulluarmik suleqatigiinnarsinnaallugit.

13. Sulisitsisut

13.1. Nalunaaquttat ingerlaqatigiiffiata nutaap UTC-2-mut allanngortinneqarnera pillugu suliffeqarfik pitsaasunik utertitsiffigineqartarsimasoq Sulisitsisut paasissutissiissutigaat, tassani Kalaallit Nunaata aamma Europa/Danmarkillu akornanni suleqatigisartakkat, pisiortorfissanut isumaqatigiissutit allallu eqqarsaatigalugit akunnermi ataatsimi ”allaffeqatigiinnerusinnaalernertik” iluarisimaarneqarluni.

Suliffeqarfik ilaasortami akornanni ”allaffiup iluani misissueqqissaarnermik” ingerlatsinikuuvoq. Apersorneqartut 76 %-init amerlanerulaartut UTC-2-miiginnarnissartik ornigineruaat, tassani Danmarkimut/Europamut nikingassutaasoq akunnerit pingasuinnaallutik. Tassani niuernissamut tunngatillugu aammalu Danmarkimi Europamilu suleqatigisartakkat eqqarsaatigalugit ajornannginnerunera tunngaviusuni pingaarnersaapput. Tamatuma saniatigut oqaatigineqarpoq UTC-2-mut allanngorluni nuunneq suliffeqarfinnut IT-lerisartunut annertuumik aningaasartuuteqarfiusimasoq, taamaattumillu UTC-3-mut uteqqinniaaraanni aamma taama annertutigisumik aningaasartuuteqarfioqqissasoq. Ersersinneqarportaaq UTC-3-mut uteqqinniarnermi teknikkikkut unammillernartoqarsinnaasoq, ingammik siunnersuutigineqartutuut aasaanerani nalunaaquttap allanngortinneqartarnera atorunnaarsiutigalugu ataatsikkut pissappat.

Sulisitsisuni apersorneqartut 14 %-ii sinnilaarlugit soqutiginnigilaat nalunaaquttat ingerlaqatigiiffiat UTC -2 imaluunniit UTC -3 atorneralaruarpat, taamaallaallu 9,5 %-iisa UTC-3-mut uteqqinnissartik kissaatigalugu.

Tusarniaanermut akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

13.2. Sinaakkutit inatsisillu allanngorartut nunatsinni inuussutissarsiornerup ineriartornissaanut – suliffeqarfiit pioreersut aningaasaleerusussinnaasullu nutaat eqqarsaatigalugit - naleqqutinngilluinnartut Sulisitsisunit oqaatigineqarpoq. Tassunga

atatillugu kattuffimmit oqaatigineqarpoq, UTC-2-mut ikaarsaarniarneq qaammatit arfiniliunngitsulluunniit matuma siorna naammassineqartoq ajornartorsiuteqanngitsumik ingerlasimanngitsoq. Maanna nalunaaquttat ingerlatigiiffiat nutaaq inuussutissarsiortunit sungiunneqareerpoq taamaattumillu nalunaaquttat ingerlaqatigiiffikuannut uteqqissagaanni inuussutissarsiornermi pilersaarusiorniarnissamut annertuumik akorngutissartaqartussaalluni. Silaannakkut angallaneq immikkut ittumik Sulisitsisunit erseqqissaavigineqarpoq, tassani nalunaaquttat ingerlaqatigiiffiannik allanngueqqittoqassappat aningaasartuuteqarfiungaatsiartussaasoq – kisiannili aamma takornariaqarnermut inuussutissarsiornermullu iluaqutaasussamik Kalaallit Nunaata tikikkuminarsarneqarnissaanut siunissami aningaasaliisussat eqqarsaatigalugit kinguneqartussaalluni.

13.3. Kalaallit Nunaanni nalunaaquttat ingerlaqatigiiffiat siunnersuutigineqartutut UTC-3-mut allanngorneqarpat kiisalu aasaanerani nalunaaquttap allanngortarnera atorunnaarsinneqarpat taamaalluni piffiit ilaanni Europamut/Danmarkimut nalunaaqutaq akunnernik tallimanik nikingasalerpat, tamanna Europami aamma Danmarkimi niueqatigiiffiillu suleqatigiinnitsinnut toqqaannartumik akornutaasinnaasoq Sulisitsisunit nalilernerqarpoq. EU-mi aasaanerani nalunaaquttap allanngortinneqartarnera atorunnaarsinneqarpat/atorunnaarsinneqassappat aatsaat nunatsinni aasaanerani nalunaaquttap allanngortinneqartarnerata atorunnaarsinneqarnissaa pissasoq Sulisitsisut isumaqarput, soorlu UPA2019/55 suliarineqarnerani piumasarineqarnikuusoq.

Tusarniaanermut akissut siunnersuutip kingunerisassaasa nalinginnaasumik nassuiaatini nassuiaatigineqarnerisa annertusinerannik nassataqarpoq.

13.4. Siunnersuutip saqqummiunneqannginnerani innuttaasut kissaataat pillugit aammalu nalunaaquttat ingerlaqatigiiffiannut UTC-3-mut allanngussagaluarpat aasaanerani nalunaaquttap allanngortarnera taamaalluni atorunnaarsinneqassagaluarpat, tassani nunatsinni niueqatigiiffiit suleqatigiillu pingaarnerit sulii aasaanerani ukiuuneranilu nalunaaquttap allanngortarneranik malinnittunut, suut kingunerisinnaanera pillugit misissuisoqarnissaanik neqeroortoqassasoq Sulisitsisunit innersuussutigineqarpoq.

Tassunga atatillugu inuit 2.700 missaanniittut nalunaaquttat ingerlaqatigiiffiannut UTC-3-mut allannguisoqarnissaanik kissaateqarsimasut siunnersuummi naapertorniarneqartut, siunnersuutip oqaaseqaataani allaqqasoq Sulisitsisut innersuussutigaat. Kalaallit Nunaanni inuit 57.000 missarluinnaat najugaqartut eqqarsaatigissagaanni taava inuit 2.700 missaanniittut kissaateqarnerat malillugu Inatsisartut inatsisaannik, nunatsinni inuussutissarsiornikkut annertuumik kinguneqarsinnaasumik saqqummiinissamut tunngavissatut annikippallaartutut Sulisitsisunit isigineqarpoq.

Ilutigisaanik aqqissuussaq nutaaq, tassani nalunaaquttat ingerlaqatigiiffiat UTC-2 Kalaallit Nunaannit malinneqartoq, pillugu nalilersuisoqassasoq Naalakkersuisut Siulittaasuat tusarniaanissaq qaammammik ataatsimik sioqqullugu nalunaarsimasoq Sulisitsisunit

innersuussutigineqarpoq. Taamatut nalilersuisoqarnissaanik saqqummiussisoqarsimarpasinnanilu suliamik aallartitsisoqarsimarpasinngilaq.

Inatsisip siumut utimullu allanngorteqattaarnissaa nunatsinni innuttaasunut, inuussutissarsiornermut ineriartormermullu annertuumik kinguneqartussaasoq Sulisitsisunit oqaatigineqarpoq, taamaattumillu inatsisissap saqqummiunneqannginnerani uppersarsinnaasumik misissuisoqarnissaanik neqeroortoqartariaqartoq.

Siunnersuuteqartup Aningaasaqarnermut Akileraartarnermullu Naalakkersuisoqarfiup tusarniaanermut akissutaanut oqaaseqaatai innersuussutigineqarput, immikkoortoq 1.2 aamma 1.5.

14. Peqqinnissaq Pillugu Kattuffiit (PPK) – Det Grønlandske Sundhedskartel

14.1. Peqqinnissaq Pillugu Kattuffiit (PPK) tusarniaanermut akissutimini paasissutissiissutigaa nalunaaquttat ingerlaqatigiiffiat atuuttoq malillugu Danmarkimi kalaallit peqqissartut angerlarsimaffiata aammalu napparsimaviit Danmarkimiittut suleqatigineqartartut ataatsimoorussamik suleqatigisarnerini piffissaq akunnermik ataatsimik PPK-mi ilaasortanut sivilisunerulersitsisimasoq. Ilutigisaanik aaqquissuussap massakkut atuuttup naalagaaffimmi suliatigut avitseqatigiissinnaanermik ilaasortat annertunerusumik periarfissaqalersippai, kiisalu Danmarkimi peqqinnissaqarfimmut attaveqaqateqarnissaq ajornannginnerulersillugu, tamannalu peqqutaalluni nakorsiat ilaannut utaqqineq sivilinnerulersimalluni.

Paasissutissat pisortanut aningaasaqarnikkut allaffissornikkullu kingunerisassat pillugit nalinginnaasumik nassuiaaatini immikkoortoq 3-mi ilanngunneqarpoq.

14.2. Innuttaasut arlallit nalunaaquttat ingerlaqatigiiffia nutaaq ajornartorsiuteqarfigisimagaat siunnersuummi oqaaseqaatini allassimasoq PPK'mit maluginiarneqarpoq, ilutigisaanillu 2024-mi upernaakkut sapaatip akunneri marluk ingerlanerini atsiornernik katersuisitsisoqarsimanera innersuussutigalugu, tassani inuit 2.700 missaanniittut nalunaaquttat ingerlaqatigiiffiannut UTC-3-mut uteqqittoqarnissaanut tapersiisimallutik. Ersarinnerusumik nassuiarneqanngilaq qanoq innuttaasut arlallit nalunaaquttat ingerlaqatigiiffiat nutaaq ajornartorsiuteqarfigisimagaat.

Siunnersuut matumani pineqartoq allannguajussuuartussatut PPK'mit paasineqarpoq, tamannalu innuttaasut amerlavallaanngitsut akornanni atsiornernik katersuisitsisimaneq tunngavigalugu kissaatigineqartoq.

Siunnersuuteqartup Aningaasaqarnermut Akileraartarnermullu Naalakkersuisoqarfiup tusarniaanermut akissutaanut oqaaseqaatai innersuussutigineqarput, immikkoortoq 1.2.

14.3. Qulaani allassimasut tunngavigalugit Inatsisartut inatsisaata allanngorneqarnissaatut siunnersuutaasoq PPK´mit akerlerineqarpoq.

Innuttaasut nalunaaquttat ingerlaqatigiiffii siumut utimullu uteqattaartinneqannginniassammata nalunaaquttat ingerlaqatigiiffiannut UTC-2-mut allannguisoqarnikuunera pillugu Naalakkersuisut sukumiisumik nalilersuisariaqartut PPK´mit kaammattuutigineqarpoq. Tamatuma saniatigut soorlu oqaaseqaatini imm. 2-mi eqqaaneqartoq, UTC-3-mut allannguisoqassappat EU-mi aasaanerani nalunaaquttat allanngorneqarnissaanut naatsorsuutigineqartut ilutigisaanik ataqatigiissaarisooqassasoq PPK´mit kaammattuutigineqarpoq.

Siunnersuuteqartup Aningaasaqarnermut Akileraartarnermullu Naalakkersuisoqarfiup tusarniaanermut akissutaanut oqaaseqaatai innersuussutigineqarput, immikkoortoq 1.5.

15. Andu Schiødt Pikilak (innuttaasoq)

Nalunaaquttat ingerlaqatigiiffiannut UTC-2-mut allannguinuq inuunerminut sunniuteqarnerlussimasooq Andu Schiødt Pikilak oqaluttuarpoq, tassami nalunaaquttat ingerlaqatigiiffiat nutaq ima isumaqarsimavoq ullormut ingerlaasini allanngortoq maannakkullu sininniarnikkut annertuumik ajornartorsiuteqarluni. Nalunaaquttat ingiaqatigiiffiannut UTC-3-mut uteqqittoqarnissaanut siunnersuut tapersersorpaa.

Aasaanerani nalunaaquttat allanngortinneqartarnera pillugu aqqissuussaq taamaaginnassappat ajoriffissaqartinngilaa.

16. Birthe Josvassen (innuttaasoq)

Aasaanerani nalunaaquttat allanngortinneqartarnera atorunnaarsinneqarnissaa Birthe Josvassenimit tapersersorneqarpoq.

17. Hans-Kristian Petrussen (innuttaasoq)

Hans-Kristian Petrussenip inatsisissatut siunnersuut tapersersorpaa.

Taanna oqaluttuarpoq Sisimiuni isikkivigissumi najugaqarluni, kisiannili seqineq tarrikkaangat aatsaat saaguersinnaasarluni illup iluata kissarujussuarternera peqqutigalugu; 28 grader tikillugu kissattarmat.

Misigivoq seqernup kissarnerata sininniarneq ajornarsisittaraa. Illup ilua nillataarnerulerniassammat ilaqtutanilu seqineq tarrisseeqqaartarpat taamaammallu aasaq manna sinnakinnerusarlutik, ullaakkut makinniarneq suliartorniarnertu nukissaasuaffigisarlugi.

Hans-Kristian Petrussenip ilanngullugu eqqaavaa Avannaani seqernup kaaviinnarfia aasaaneralu misilittagaqarfigalugit, kisianni tappavani kissarnera allanngujaannerusartoq taamaattumillu atoruminarnusarluni, Sisimiuni seqineq tarrittarpoq nillertillunilu ullaakkullu kissatseqqittarluni. Misigivoq tamanna timimut allatut sunniuteqartartoq.

18. Hennie Nielsen Lange (innuttaasoq)

Hennie Nielsen Langeq nalunaaquttat ingerlaqatigiiffiannut UTC-3-mut uteqqittoqarnissaanut siunnersuut tapersersorpaa.

19. Bikki Kleist Jepsen (innuttaasoq)

Bikki Kleist Jepsen isumaqarpoq nalunaaquttat ingerlaqatigiiffiannut maanna atuuttumut ikaarsaariarnermi takornariat timmisartullu siusinnerusukkut tikittalernissaat eqqarsaatigineqarsimasut, tamatumanili aalisartut piniartullu inuiaqatigiillu sinneri tusarniarneqarsimanngitsut. Nalunaaquttat allannguuteqartinneqarnera innuttaasunut ullaakkut unnukkullu annertuumik (pitsaanngitsumik) sunniuteqartoq maluginiarpaa.

20. Klara Rosing (innuttaasoq)

Aasaanerani nalunaaquttamik aqqissuussinerup atorunnaarsinneqarnissaa Klara Rosingimit tapersersorneqarpoq. Aasaanerani nalunaaquttamit ukiuunerani nalunaaquttamut ikaaraariartarnerit namminiinnanngitsaq ingerlariaatsiminut, aammali allarpassuit ulloq unnuarlu ingerlariaasiannut akornusiisartut misigisimavoq. Ilaqutariit ukiukitsortallit utoqqaallu aasaanerani nalunaaquttamit ukiuunerani nalunaaquttamut ikaarsaariartoqarnerani ulluinnarni inuunertik allanngortittarmassuk eqqarsaatigineqassoq kaammattuutigaa.

21. Susanne Høegh (innuttaasoq)

Susanne Høeghip maluginiarpaa, nalunaaquttat ingerlaqatigiiffiata allanngortinnneqarnerata kingorna unnukkut qaamanerusarlenera malunnartorujussuusoq. Nalunaaquttat ingerlaqatigiiffiannut UTC-3-mut uteqqinnissamik siunnersuut tapersersorpaa.

22. Tuperna Heinrich (innuttaasoq)

Tuperna Heinrichip kaammattuutigaa nalunaaquttat ingerlaqatigiiffiannut UTC-3-mut uteqqittoqassasoq.

23. Ulla Lyng Heilmann (innuttaasoq)

Ulla Lyng Heilmann isumaqarpoq nalunaaquttamik allanngueqqissanngitsugut. Nalunaaquttat ingerlaqatigiiffiat nutaaq maanna atuuttoq imminerminut ilaquttaminullu iluaqutaaginnarsimavoq. Aappariit meeqqatillu ualikkut pinngortitamiinnerminni sisorarlutik, qamuterallutik, angallammik angalaarlutik cykelerlutik nuannarisarsimavaat.